

四庫全書

集部

欽定四庫全書

集部

詞苑叢談卷八

詳校官檢討臣羅國俊

侍讀臣孫球覆勘

總校官原任中允臣王燕緒

校對官中書臣石鴻翥

謄錄監生臣姚希慶

謄錄舉人臣李達泰

欽定四庫全書

詞苑叢談卷八

翰林院檢討徐鉉撰

紀事三

遼蕭后有十香詞其構禍之由也雖事出冤誣然以帝  
后之尊為奴婢作書且詞多近褻自貽伊戚夫復何言  
獨喜其回心院詞則怨而不怒深得詞家含蓄之意斯  
時柳七之調尚未行于北國故蕭詞大有唐人遺意也

詞云掃深殿閉久金鋪暗遊絲絡網塵作堆積歲青苔  
厚堦面掃深殿待君宴拂象床憑夢借高唐敲壞半邊  
知妾臥恰當天處少輝光拂象牀待君王換香枕一半  
無雲錦為是秋來展轉多更有雙雙淚痕滲換香枕待  
君寢鋪翠被羞殺鴛鴦對猶憶當時叫合歡而今獨覆  
相思塊鋪翠被待君睡裝綉帳金鈎未敢上解却四角  
夜光珠不教照見愁模樣裝綉帳待君眠疊錦茵重重  
空自陳只願身當白玉體不願伊當薄倖人疊錦茵待

君臨展瑤席花笑三韓碧笑妾新鋪玉一牀從來婦歡  
不終夕展瑤席待君息剔銀燈須知一樣明偏是君來  
生彩暈對妾故作青熒熒剔銀燈待君行熬薰爐能將  
孤悶蘇若道妾身多穢賤自沾御香香徹膚熬薰爐待  
君娛張鳴箏恰恰語嬌鶯一從彈作房中曲常和窓前

風雨聲張鳴箏待君聽

按蕭后小字觀音工書能歌詩善彈箏琵琶天祐帝敕為懿德

皇后帝遊畋無度蕭后諷詩切諫帝疎之作回心院詞寓望幸之意也宮女單登故叛人重元家婢亦善箏及琵琶與伶官趙惟一爭能怨后不知已遂與耶律伊遜謀害后更令他久作十香詞偽云宋國達拉哈福晋作

欽定四庫全書

卷八

乞后書之遂誣后與惟一通以十香詞為証因被害達拉哈福晉皇后也

海陵大舉南侵御前都統驃騎衛大將軍韓夷邪將射  
雕軍二萬三千圍子細軍一萬先下兩淮臨發賜所製  
喜遷鶯以為寵曰旌麾初舉正馱馱力健嘶風江渚射  
虎將軍落鵬都尉繡帽錦袍翹楚怒礫戟聲爭奮捲地  
一聲鼙鼓笑談頃指長江齊驟六師飛渡此去無自墮  
金印如斗獨把功名取斷鎖機謀垂鞭方畧人事本無  
今古試展卧龍韜韞果見成功且莫問江左想雲霓望

切玄黃迎路

金許道真性嗜酒每乘舟出村落間留飲或十數日不  
歸及汭流而上老稚奔走爭為之挽舟數十里不絕嘗  
賦眼兒眉詞曰濁醪寫得玉為漿風韻帶橙香持杯笑  
道鵝黃似酒酒似鵝黃世緣老矣不思量沈醉又何妨  
臨風對月山歌野詠儘我踈狂

金密國公璫字子瑜興陵諸孫也于書無所不讀而尤  
長於史學與元好問諸名士善明窓棐几展玩圖籍商

略品第窮極高妙典衣置酒或終日不聽客去有承平  
王家故態金自明昌以還鐫厲二王得罪跡遠宗室璫  
亦棄而不用故放于詩文其樂府云夢到鳳凰臺上山  
圍故國周遭又云咫尺又還秋也不成長似雲間識者  
聞而悲之又有西江月詞云一百八般佛事二十四考  
中書山林朝市等區區著甚來由自苦過寺談些般若  
逢花倒箇葫蘆小時伶俐老來愚萬事安于所遇又臨  
江仙詞云倦客更遭塵事冗故尋閒地婆娑一尊芳酒



一聲歌盧郎心未老潘令髮先皤醉向繁臺臺上問滿  
川細柳新荷薰風樓閣夕陽多倚欄凝思久漁笛起烟  
波

秦和己丑元好問裕之赴并州道逢捕雁者捕得二雁  
一死一脫網去其脫網者空中盤旋哀鳴良久亦投地  
死好問遂以金贖得二雁瘞汾水傍壘石為識號曰雁  
丘因賦摸魚兒詞曰問世間情是何物直教生死相許  
天南地北雙飛客老翅幾回寒暑歡樂趣離別苦就中

更有癡兒女君應有語渺萬里層雲千山暮雪隻影向  
誰去橫汾路寂寞當年簫鼓荒烟依舊平楚招魂楚些  
嗟何及山鬼暗啼風雨天也妒未信與鶯兒燕子俱黃  
土千秋萬古為留待騷人狂歌痛飲來訪雁丘處蒲溪  
楊正卿和云恨年年雁飛汾水秋風依舊蘭渚網羅驚  
破雙棲夢孤影亂翻波素還碎羽算古往今來只有相  
思苦朝朝暮暮想塞北風沙江南煙月爭忍自來去埋  
恨處依舊并州舊路一丘寂寞寒雨世間多少風流事

天也有心相妬休說與還却怕有情多被無情誤一盃  
會舉待細讀悲歌滿傾清淚為爾酹黃土樂城李仁卿  
和云雁雙雙正分汾水回頭生死殊路天長地久相思  
債何似眼前俱去摧勁羽倘萬一幽冥却有重逢處詩  
翁感遇把江北江南風嘹月唳并付一丘土仍為汝小  
草幽蘭麗句聲聲字字酸楚拍江秋影今何在草木欲  
迷隄樹霜魂苦算猶勝王嫱青塚真孃墓憑誰說與對  
鳥道長空龍艘古渡馬耳淚如雨

元光初李欽叔與元裕之在孟津辛敬之愿自女儿來  
為留數日其行也欽叔為設饌備極豐腴敬之放筋嘆  
曰平生飽食有數每見吾二弟必得美食明日道路中  
又當與老飢相抗去矣會有一日辛老子僵卧柳泉韓  
城之間以天地為棺槨日月為含襚狐狸亦可螻蟻亦  
可二人為之惻然嘗共遊河山亭敬之賦臨江仙留別  
二人云誰識虎頭峯下客少年有意功名清朝無路到  
公卿蕭蕭華屋白髮老諸生邂逅對床逢二妙揮毫

落紙堪驚他年連袂上蓬瀛春風蓮燭莫忘此時情  
宋六小字同壽元遺山有贈感栗工張翥兒詞即其父  
也亦與其夫合樂妙入神品蓋善謳其夫能傳其父之  
藝滕玉霄賦念奴嬌贈之云柳顰花困把人間恩愛樽  
前傾盡何處飛來雙比翼直是同聲相應寒玉嘶風香  
雲捲雪一陣驪珠引元郎去後有誰著意題品誰料濁  
羽清商繁絃急管猶自餘風韻莫是紫鸞天上曲兩兩  
玉童相並白髮梨園青山老傳試與留連聽可人何處

滿庭霜月清冷

元宣徽院使博囉有杏園每年春諸女設鞦韆于園中  
適樞密同簽特穆爾布哈子拜珠過園外窺一女絕色  
歸白之父遣媒求婚博囉邀令賦鞦韆拜珠以國字寫  
菩薩蠻詞云紅繩畫板柔荑指東風燕子雙雙起誇俊  
與爭高更將裙繫牢牙床和困睡一任金釵墜推枕起  
來遲紗窓月上時博囉遂以前女許為婦

鄭義孃宣政間楊思厚妻薩巴太尉自盱眙掠得之不

辱而死魂常出遊思厚奉使燕山訪其瘞處與之相見  
有好事近詞云往事與誰論無語暗彈清血何處最堪  
腸斷是黃昏時節倚樓凝望又徘徊誰解此情切何計  
可同歸雁趣江南春色

大名民家有男女以私情不遂赴水死後三日二尸相  
攜而出于水濱是歲此陂荷花無不並蒂者李仁卿賦  
摸魚兒以記其事云為多情和天也老不應情遽如許  
請君試聽雙葉怨方見此情真處誰點注香澹灩銀塘

對抹燕脂露藕絲幾縷絆玉骨春心金沙曉淚漠漠瑞  
紅吐連理樹一樣驪山懷古古今朝暮雲雨六郎夫婦  
三生夢幽恨從來艱阻須念取共鴛鴦翡翠照影長相聚  
秋風不住悵寂寞芳魂輕烟北渚涼月又南浦

李仁卿  
名治樂

城人金  
進士

歌兒珠簾秀朱氏姿容姝麗雜劇當時獨步胡紫山宣  
慰極鍾愛之嘗擬沉醉東風小曲以贈云錦織江邊翠  
竹絨穿海上明珠月淡時風清處都隔斷落紅塵土一



片閒情任卷舒挂盡朝雲暮雨馮海粟亦有鷓鴣天云  
十二闌干映遠眸醉香空斷楚天秋蝦鬚影薄微微見  
龜背紋輕細細浮香霧斂翠雲收海霞為帶月為鉤夜  
來捲盡西山雨不著人間半點愁皆咏珠簾以寓意也  
由是聲價益騰

正大四年有狂僧李菩薩者就都人楊廣道家宿一日  
大寒楊與之酒李晨出舉酒盃聞其嚙酒聲入曰淨明  
亭前花開矣已而牡丹開兩花來觀者車馬闐咽酒尊

為之一空元遺山賦滿庭芳詞記之云天上殷韓解羈  
官府爛遊舞榭歌樓開花釀酒來著帝王州嘗見牡丹  
開後獨占斷穀雨風流僊家好霜天槁葉濃艷破春柔  
狂僧誰借手一杯喚起綠怨紅愁天香國艷梅菊背人  
羞盡揭紗籠護日容光動玉笋瓊舟都人士女年年十  
月常記遇仙樓

京師城外萬柳堂亦一宴遊處也野雲廉公一日于中  
置酒招踈齋盧公松雪趙公同飲時歌兒劉氏名解語

花者左手折荷右手執盃歌小聖樂云綠葉陰濃偏水  
亭池閣偏趣涼多海榴初綻朵朵蹙紅羅乳燕雛鶯弄  
語對高柳鳴蟬相和驟雨過似瓊珠亂撒打遍新荷人  
生百年有幾念良辰美景休放虛過富貴前定何用苦  
張羅命友邀賓宴賞飲芳醕淺斟低歌且酩酊從教二  
輪來往如梭右調元  
遺山製既而行酒趙公喜即席賦詩曰萬  
柳堂前數畝池平鋪雲錦蓋漣漪主人自有滄洲趣遊  
女仍歌白雪詞手把荷花來勸酒步隨芳草去尋詩誰

知咫尺京城外便有無窮萬里思

元妓劉燕哥善歌舞齊叅議還山東劉賦太常引以餞  
云故人別我出陽關無計鎖雕鞍今古別離難倩誰畫  
蛾眉遠山一樽別酒一聲杜宇寂寞又春殘明日小樓  
間第一夜相思淚彈

元盛時揚州有趙氏者富而好客其家有明月樓人作  
春題多未當其意一日趙子昂過楊主人知之迎至樓  
上盛筵相款酒半出紙筆求作春題子昂援筆書云春

風閨苑三千客明月揚州第一樓主人得之甚喜盡徹  
席間銀器以贈貫雲石亦有詞咏樓調寄水龍吟云晚  
來北海風沈滿樓明月留人住橘花香外玉笙初響修  
眉如妬十二闌干等閒隔斷人間風雨望畫橋檐影紫  
芝塵暖又喚起登臨趣回首西山南浦問雲物為誰掀  
舞關河如此不堪騎鶴儘堪來去月落潮平小衾夢轉  
已非吾土且從容對酒龍香沈繭寫平山賦

姚雲東晚慕神僊喜與黃冠遊嘗為陸道士寫墨竹系

以一詞云王子仙成吹簫處一雙青鳳飛來借問如今  
世界何地是蓬臺更有葛坡投杖龍躍起鼓浪轟雷何  
如我咏猗猗菴竹淇水之湄蒼雪生吾珍簟碧香又落  
霞杯喚道人相對醉後玉山頽百年笑口開得幾千回  
湯正仲字叔雅楊補之甥寫梅法補之楷法適整學褚  
河南而加蒼老嘗書補之所作梅詞柳梢青十首詞亦  
工麗今錄其二詞云雪艷烟痕又邀春色來到芳樽憶  
得年時月移清影人立黃昏一番幽思誰論但永夜空

迷夢魂遶遍江南繚牆深院水郭山村又云玉骨冰肌  
為誰偏好特地相宜一段風流廣平休賦和靖無詩綺  
窓睡起春遲困無力菱花笑窺嚼蘂吹香眉心貼處鬢  
畔簪時

李竹懶曰梅道人做荆浩寫魚舫十五中段樹石一叢  
前後山嶼遠近出沒四五疊予兩見臨本至今壬申三  
月始見真者氣象煥如也梅老題云予最喜關仝山水  
清勁可愛觀其筆法出自荆浩後見浩畫唐人漁父圖

有如此製作遂做為一軸為人求去今復見之不意物  
之有遇時也一日准仲持此卷來命識之時昔之畫今  
之題殆十餘年矣流光易謝悲夫至正十二年七月十  
日梅道人書於武塘慈雲之僧舍又畫上方題漁家傲  
詞瀟灑超逸逼真玄真子口吻亦道人所製書作藏針  
筆法古雅有餘其一云碧波千頃晚風生舟船湖邊一  
葉橫心事穩草衣輕只釣鱸魚不釣名其二云收却絲  
綸歇却船江頭明月正團圓酒瓶側岸花懸枕著蓑衣



和月眠其三云輕風細浪漾漁船碧水斜陽欲暮天看  
白鳥下長川點破瀟湘萬里烟其四云閒情聊爾寄絲  
綸處處江湖著我身波似練髻如銀欲釣如山截海鱗  
其五云極目乾坤夕照斜碧波微影弄晴霞舟有伴興  
無涯那个汀洲不是家其六云近日何人是我鄰湍川  
鳬鴨最相親雲浩浩水鱗鱗青草烟深不見人其七云  
舴艋為家無姓名胡盧世事過平生香稻飯軟蓴羹棹  
月穿雲任性情其八云雪色鬚髯一老翁能將短棹撥

長空人愛靜浪無風宜在五湖烟雨中其九云綠楊初  
睡暖風微萬里晴波浸落暉鼓枻去唱歌回驚起沙鷗  
撲漉飛其十云年來情況屬漁船人在船中酒在前山  
厯厯水涓涓一曲清歌山月邊其十一云風攬長江浪  
拍空扁舟蕩漾夕陽紅歸別浦繫長松出自風恬浪息  
中其十二云一箇輕舟力幾多江湖穩處載漁蓑撐皓  
月下長坡半夜風生不奈何其十三云殘霞一縷四山  
明雲起雲收陰復晴風脚動浪頭生聽取虛篷夜雨聲

其十四云鈎擲萍波綠自開錦鱗對對逐鈎來消歲月  
寄芳懷却似嚴光坐釣臺其十五云桃花水暖五湖春  
一箇輕舟寄此身時醉酒或垂綸江北江南適意人

元時有傅按察者嘗作鴨頭綠一詞悼宋云靜中看記  
昔日淮山隱隱宛若虎踞龍蟠下樊襄指揮湘漢鞭雲  
騎圍繞三千勢不成三時當混一過唐之數不為難陳  
橋驛孤兒寡婦久假當還挂征帆龍舟催發紫宸初轉  
朝班禁庭空土花暈碧輦路悄呵喝聲乾縱餘得西湖

風景花柳亦凋殘去國三千遊仙一夢依然天淡夕陽  
閒昨宵也一輪明月還照臨安

劉改之過賀新郎詞云去年秋余試牒四明賦贈老娼  
至今天下與禁中皆歌之江西人來以為鄧南秀詞非  
也詞云老去相如倦向文君說似而今怎生消遣衣袂  
京塵曾染處空有香紅尚軟料彼此魂銷腸斷一枕新  
涼眠客舍聽梧桐疎雨秋風顫燈暈冷記初見樓低不  
放珠簾捲晚粧殘翠蛾狼籍淚痕流臉人道愁來須殢

酒無奈愁深酒淺但托意焦琴紉扇莫鼓琵琶江上曲  
怕荻花風月俱淒怨雲萬疊寸心遠

宋文丞相過唐忠臣張巡許遠雙廟留題沁園春一闋  
詞旨壯烈千載後昭然與日月爭光明劉文成伯溫過  
安慶亦作沁園春詞哀余忠宣公闕正與文山之詞相  
匹詞云士生天地間人孰不死死節為難羨英偉奇才  
世居淮甸少年登第拜命金鑾面折奸貪指揮風雨人  
道先生鐵肺肝平生事扶危濟困拯溺摧頑清明要繼

文山使康懦聞風膽亦寒想孤城血戰人皆效死闔門  
抗節誰不辛酸寶劍埋光星芒失色露濕旌旗也不乾  
如公者黃金難鑄白壁誰完

劉秉忠字子晦自號藏春散人嘗有三奠子詞曰念行  
藏有命煙水無涯嗟去雁羨歸鴉半生身累影一事鬢  
成華東山客西蜀道且還家壺中日月洞裏煙霞春不  
老景長佳功名眉上鎖富貴眼前花三杯酒一覺睡一  
甌茶

張怡雲大都名妓也姚牧庵靜軒每于其家小飲嘗  
佐貴人行酒姚偶言暮秋時三字閨命怡雲續而歌之  
張應聲作小婦孩兒且歌且笑曰暮秋時菊殘猶有傲  
霜枝西風了却黃花事貴人曰且止遂不成章姚又有  
寄征衣詞云欲寄君衣君不還不寄君衣君又寒寄與  
不寄間妾身千萬難人多傳之

張弘範圍襄陽賦鷓鴣天詞曰鐵甲珊珊渡漢江南蠻  
猶自不歸降東西勢列千層厚南北軍屯百萬長弓扣

月劍磨霜征鞍遙指下襄陽鬼門今日功勞了好去臨  
江醉一場

古今詞話云蜀中有一寡婦姿色絕美父母憐其年少  
欲議再嫁歸家有喜宴伶唱一詞婦聞之流涕于神前  
欲割一耳以明志其母速止之遂不易其節詞云昔年  
曾伴花前醉今年空洒花前淚花有再榮時人無重見  
期故人情意重不忍榮新寵日月有盈虧妾心無改移

浪淘  
沙



名姬張玉蓮喜延士夫復揮金不惜後入樂籍班彥功  
與之狎班司儒秩滿北上張作小詞贈之有朝夕思君  
淚點成斑之句入云側耳聽門前過馬和淚看簾外飛  
花尤膾炙人口

王駙馬誥字晉卿尚英宗女魏國大長公主嘗賦憶故  
人詞云燭影搖紅向夜闌乍酒醒心情懶尊前誰為唱  
陽關離恨天涯遠無奈雲沉雨散凭闌干東風淚眼海  
棠開後燕子來時黃昏庭院能改齋漫錄云都尉憶故

人作徽宗喜其詞意猶以不豐容宛轉為憾遂令大晟府別撰腔周美成增益其詞而以首句為名謂之燭影

搖紅云

按原詞甚佳美成  
增益反不及也

世俗以二月十五為花朝節杭城園丁競以名花荷檐  
叫鶯音中律呂喬夢符有賣花聲詞云侵曉園丁叫道  
嫩紅嬌紫巧工夫攢枝餽藥行歌佇立灑洗粧新水捲  
香風看街簾起深深巷陌有箇重門開未忽驚他尋春  
夢美穿窬透閣便憑伊喚取惜花人在誰根底按夢符

又有天淨沙詞云鶯鶯燕燕春花花柳柳真真事事  
風風韻韻嬌嬌嫩嫩停停當當人人此等句亦從李易  
安尋尋覓覓得來

張伯遠九月九日見桃花作小令云前度劉郎老矣去  
年崔護來遲紅雨飛西風起望白衣可憐憔悴去蜂愁  
蝶未知冷落在天台洞裏

僧洪覺範久客南昌獨行無侶意緒蕭然偶登秋屏閣  
望西山浩然有歸志作浪淘沙云城裡久偷閒塵浣雲

衫此身已是再眠蠶隔岸有山歸去好萬壑千巖霜曉  
更凭闌滅盡晴嵐微雲生處是茆庵試問此生誰作伴  
彌勒同龕

鄭雲娘寄張生西江月詞云一片冰輪皎潔十分桂魄  
婆婆不施方便是如何莫是姮娥妬我雖則清光可愛

奈緣好事多磨仗誰傳與片雲呵遮取霎時則個

鄭又有奇

張堯上鞋兒曲云朦朧月影黯淡花陰獨立等多時只  
怕冤家乖約又恐他側畔人知千回作念萬般思想心  
下暗猜疑幕地傳來厮見風前語顫聲低輕移蓮步暗  
卸羅衣攜手過廊西正是更闌人靜向粉郎故意矜持

片時雲雨幾多歡愛依舊雨分離  
報道情郎且住待奴覓上鞋兒

王晉卿得罪外謫後房善歌者名嚬春鶯為密縣馬氏  
所得晉卿還朝賦一聯云佳人已屬沙吒利義士曾無  
古押衙有客為足成之云回首音塵兩沉絕春鶯休嚬  
沁園花晉卿淒然賦蝶戀花詞云鐘送黃昏雞報曉昏  
曉相催世事何時了萬恨千愁人自老春來依舊生芳  
草忙處人多閒處少閒處光陰幾個人知道獨上高樓  
雲杳杳天涯一點青山小

嘉定間平江妓送太守詞曰春色原無主荷東君著意  
看承等閒分付多少無情風雨恨又那更蝶欺蜂妒算  
燕雀眼前無數縱使簾櫳能愛護到如今已是成遲暮  
芳草碧遮歸路看看做到難言處怕去仙郎輕颺旌旗  
易歌襦袴月滿西樓絃索靜雲蔽崑城閭府便恁地一  
帆輕舉獨倚闌干愁拍碎慘玉容淚眼如經雨去與住

兩難訴

或云是蒲江  
盧申之作

眉山程正伯號書舟與錦江某妓眷戀甚篤別時作

酷相思詞云月挂霜林寒欲墜正門外催人起奈離別  
如今真個是欲住也留無計欲去也來無計馬上離情  
衣上淚冬月俱憔悴問江路梅花開也未春到也須頻  
寄人到也須頻寄

吳彥高在燕山赴張總持侍御家集張出侍兒佐酒中  
有一人意狀摧抑叩其故乃宣和殿小宮婢也因賦人  
月圓詞記之聞者揮淚其詞曰南朝千古傷心事猶唱  
後庭花舊時王謝堂前燕子飛向誰家恍然一夢仙肌

勝雪雲髻堆鴉江州司馬青衫淚濕同是天涯時宇文  
叔通亦賦念奴嬌先成及見此作茫然自失是後人有  
求作樂府者叔通即批云吳郎近以樂府名天下可往

求之

見中州樂府

陳妙常拒張于湖詞云清靜堂前不捲簾景幽然閒花  
野草漫連天莫胡言獨坐洞房誰是伴一爐烟閒來窓

下理琴絃小神仙

詞見初畱集陳後偶潘必正

元薩都拉西湖竹枝詞云湖上美人彈玉箏小鶯飛度



綠窓櫺沈郎雖病多情在倦倚屏山不厭聽一時妓女  
多歌之

宿州營妓張玉姐字溫卿技冠一時見者皆屬意波子  
山為獄掾最所鍾愛罷官遂次南京念之不忘為剔銀  
燈詞云江上秋高霜早雲靜月華如掃候雁初飛啼螿  
正苦又是黃花衰草等閒臨照潘郎鬢星星易老邨  
堪更酒醒孤棹望千里長安西笑臂上粒痕胸前淚粉  
暗惹離愁多少此情誰表除非是重相見了其後明

道中張子野先黃子思孝先相繼為掾尤賞之偶陳師  
之求古以光祿丞來掌權酤溫卿遂托其家僅二年而  
亡才十九歲子思以詩弔之云人生第一莫多情眼看  
仙花結不成為報兩京才子道好將詩句哭溫卿子思  
有愛姬宜哥死州中遺言葬隄下冀他日過此得一見  
以慰孤魂子思從之作詩納棺中其斷章云恩同花上  
露留得不多時二人皆葬于宿州柳岸之東子野嘉祐  
中過而題詩云好物難留古亦嗟人生無物不塵沙何

時宰樹連雙塚結作人間並蒂花

豫章寓荊州除吏部郎再辭得請守當塗才到官七日而罷又數日乃去其詩云歐借腰肢柳一縷大梅權佐小梅歌舞餘細點梨花雨奈此當塗風月何豫章又有木蘭花令叙云庭堅假守當塗故人庾元鎮窮巷讀書不出入州縣因作此以勸庾酒云庾郎三九常安樂便有萬錢無處着徐熙小鴨水邊花明月清風都占却朱顏老盡心如昨萬事休休休莫莫尊前見在不饒人歐

舞君歌梅更酌自注云歐梅當塗二妓也

去年今日從駕遊西苑彩仗壓金波看水戲魚龍曼衍  
寶津南殿宴席近天顏金杯酒君王勸頭上官花顫六  
軍錦繡萬騎穿楊箭日夕翠華歸擁鈞天笙歌一片如  
今關外千里未歸人前山雨西樓晚望斷思君眼此陳  
濟翁薦山溪詞也舍人張孝祥知潭州因宴客妓歌此  
至金盃酒君王勸頭上官花顫其首自為之搖顫者數  
四坐客匿笑不止而孝祥不覺也

紹興庚午台之黃巖妓有姓謝者與楊芳情好甚篤為  
姬所制相約投江好事者為望海潮以吊之云彩筒  
角黍蘭橈畫舫佳節競吊沅湘古意未收新愁又起斷  
魂流水茫茫堪笑又堪傷有臨臯仙子連璧檀郎暗約  
同歸遠煙深處弄滄浪倚樓魂已飛揚共偷揮玉筋痛  
飲霞觴烟水無情揉花碎玉空餘怨柳淒涼楊謝舊遺  
芳算世間縱有不恁非常但看芙蓉並蒂他日一雙雙  
中吳紀聞云吳應字感之以文章知名天聖二年省試

第一又中天聖九年書判拔萃科仕至殿中丞居小市  
橋有侍姬曰紅梅因以名其閣嘗作折紅梅詞曰喜輕  
漸初泮微和漸入芳郊時節春消息夜來陡覺紅梅數  
枝爭發玉溪仙館不是箇尋常標格化工別無一種風  
情似勻點胭脂染成香雪重吟細閱比繁杏夭桃品流  
真別只愁共彩雲易散冷落謝池風月憑誰向說三弄  
處龍吟休咽大家留取倚闌干聞有花堪折勸君須折  
其詞傳播人口春日羣宴必使優人歌之

楊元素本事  
曲誤以為蔣

堂侍郎有小鬟號紅梅

某殿丞作此詞贈之

西湖志餘云聶大年嘗賦卜算子云楊柳小蠻腰慣逐  
東風舞學得琵琶出教坊不是商人婦忙整玉搔頭春  
筍纖纖露老却江南杜牧之懶為秋娘賦又云粉淚濕  
鮫綃只怨郎情薄夢到巫山第幾峰酒醒燈花落數日  
尚春寒未把羅衣着眉黛含顰為阿誰但悔從前錯二  
詞蓋自況也

吳虎臣漫錄云別酒送君君一醉清潤潘郎更是何郎

婿記得釵頭新  
利市莫將分付東鄰子  
回首長安佳麗地  
三十年前我是風流帥  
為向青樓尋舊事  
花枝缺處餘名字  
右蝶戀花詞  
東坡在黃時送潘邠老赴省試作也  
今集不載

又云徽宗天才甚高詩文之外尤工長短句嘗為探春令云  
簾旌微動悄寒天氣龍池冰泮杏花笑吐香紅淺  
又還春將半清歌妙舞從頭按等芳時開宴況去年對  
着東風嘗許不負鶯花願宣和乙巳冬幸亳州途次御



製臨江仙云過水穿山前去也吟詩約句千餘淮波寒  
重雨踈踈烟籠灘上驚人買就船魚古寺幽房住夜深  
宿在僧居夢魂驚起轉嗟吁愁牽心上慮和淚寫回書  
洪覺範嘗為長短句贈一女真云十指嫩抽新笋纖纖  
玉染紅柔人前欲展強嬌羞微露雲衣霓袖最好洞天  
春曉黃庭卷罷清幽凡心無計奈閒愁試撚梨花頻嗅  
范周字無外純古之子工于詩詞不求聞達安貧樂道  
未嘗屈節于人盛季文作守時頗嫚士嘗于元宵作寶

鼎硯詞投之極蒙嘉獎因遺酒五百壺其詞播于天下  
每遇燈夕諸郡皆歌之詞云夕陽西下暮靄紅溢香風  
羅綺乘麗景華燈爭放濃焰燒空連錦砌皓月侵嚴  
城如畫花影寒籠絳藥漸掩映芙蓉萬頃迤邐齊開秋  
水太守無限行歌意擁麾幢光動珠翠傾萬井歌臺舞  
榭瞻望朱輪駢鼓吹控寶馬耀貔貅千騎銀燭交光數  
里似亂簇寒星萬點擁入蓬壺影裏宴歌多才環艷粉  
瑤簪珠履恐看看丹詔催奉宸遊燕侍便趁早占通宵

醉緩引笙歌妓任畫角吹老寒梅月滿西樓十二

中吳紀聞

蜀路泥溪驛天聖中有女郎盧氏者隨父往漢州作縣  
令歸題于驛舍之壁其序略云登山臨水不廢謳吟易  
羽移商聊紓羈思因成鳳樓梧一曲書之驛壁詞云蜀  
道青天煙靄翳帝里繁華迢遞何時至回望錦川揮粉  
淚鳳釵斜亸烏雲膩鈿帶雙垂金縷細玉珮珠璫露滴  
寒如水從此蠻粧添遠意畫眉學得遙山翠

徐幹臣伸三衢人政和初以知音律為太常典樂出知

常州嘗自製轉調二郎神詞云悶來彈鵲又攪碎一簾  
花影謾試着春衫還思纖手薰徹金虬燼冷動是愁端  
如何向更怪得新來多病嗟舊日沈腰而今潘鬢怎堪  
臨鏡重省別時淚滴羅襟猶凝料為我懨懨日高慵起  
長託春醒未醒雁足不來馬蹄難駐門掩一亭芳景空  
佇立盡日闌干倚遍畫長人靜既成會開封尹李孝壽  
來牧吳門李以嚴治京兆人號閻羅道出郡下幹臣合  
樂大燕勞之諭羣娼令謳此詞必待其問乃止娼如戒

歌至三四李果詢之幹臣蹙額曰某頃有一侍婢色藝冠絕前歲以亡室不容遂去今聞在蘇州一兵官處屢遣信欲復來而主人靳之感慨賦此詞中所叙多其書中語今適有天幸公擁旄于彼不審能為我地否李云此甚不難可無慮也既至無錫賓贊者請受謁次第李云郡官當至楓橋距城十里而迎翼日艤舟其所官吏上下望風股栗李一閱刺忽大怒云都監在法不許出城迺亦至此使郡中萬一有火盜之虞豈不殆哉斥都

監下堦荷校送獄又數日取其供牘判奏字其子震懼  
求援宛轉哀鳴致懇李笑云且還徐典樂之妾來理會  
即日承命然後舍之

周美成為江寧府溧水令主簿之室有色而慧美成每  
款洽于尊席之間世所傳風流子蓋所寓意焉詞云新  
綠小池塘風簾動碎影舞斜陽金屋去來舊時巢燕土  
花繚繞前度葦蒿繡鳳幃深幾許聽得理絲簧欲說  
又休慮乖芳信未歌先噎愁轉清商暗想新粧了開朱

戶應自待月西廂最苦夢魂今宵不到伊行問甚時說  
與佳音密耗擬將秦鏡偷換韓香天便教人霎時厮  
見何妨新綠待月皆薄廳亭軒之名也

成都妓尹溫儀本良家女後以零替失身妓籍蔡相帥  
成都酷愛之尹告蔡乞除樂籍蔡戲曰若樽前成一小  
闋便可除免尹曰乞腔調蔡答以西江月尹又乞嚴韻  
蔡曰汝排十九用九字即便應聲曰韓愈文章蓋世謝  
安才貌風流良辰開宴在西樓敢勸一杯芳酒記得南

宮高遇弟兄都占鰲頭一門金殿御香浮名在甲科第  
九蓋蔡取第九人弟元度十一人也

花草  
粹編

豫章先生弟黃元明宰廬陵縣赴郡會座上巾帶偶脫  
太守諭妓令綴之既畢俾元明撰詞云銀燭畫堂如畫  
見林宗巾墊羞蓬首斜插花枝線賒羅袖須臾兩帶還  
依舊倒帶休今後也不須更澆淵明酒寶篋深藏濃香  
薰透為經十指如蔥手蓋七娘子也

李邴字漢老任城人崇寧間進士為資政殿學士漢老



少日作漢宮春詞云瀟灑紅梅向竹梢疎處橫兩三枝  
東風亦不愛惜雪壓霜欺無情燕子怕春寒輕失花期  
惟是有南來塞雁年年長見開時清淺小溪如練問玉  
堂何似茅舍疎籬傷心故人去後冷落新詩微雲淡月  
對孤芳分付他誰空自倚清香未減風流不在人知一  
時贈炙人口政和間丁憂歸山東服終造朝舉國無與  
談者方偃偃無計時王黼為首相忽遣人招至東閣開  
宴出其家姬十數人酒半唱是詞侑觴大醉而歸數日

遂有館閣之命

劉一止字行簡宣和進士賦喜遷鶯詞云曉光催角聽  
宿鳥未驚鄰雞先覺迤邐烟村馬嘶人起殘月尚穿林  
薄淚痕帶霜微凝酒力衝寒尚弱歎倦客悄不禁重染  
風塵京洛追念人別後心事萬重難覓孤鴻托翠幌嬌  
深曲屏香暖爭念歲寒飄泊怨月恨花須不是不曾經  
着這情味望一成消滅新來還惡陳質齋云行簡是詞  
盛傳京師號劉曉行

阮閱建炎初知袁州致仕寓居宜春有贈宜春官妓趙  
佛奴洞仙歌云趙家姊妹合在昭陽殿因甚人間有飛  
燕見伊底盡道獨步江南便江北也何曾慣見惜伊情  
性好不解嗔人長帶桃花笑時臉向尊前酒底見了須  
歸似恁地能得幾回細看待不眨眼兒覷著伊將眨眼  
工夫看伊幾遍

阮著詩  
話總述

趙彥端字德莊宋宗室之秀賦西湖謁金門詞云休相  
憶明夜遠如今日樓外綠烟村暮暮花飛如許急柳外

晚來船集波底夕陽紅濕送盡去雲成獨立酒醒愁又  
入阜陵問誰詞答云彥端所作上云我家裡人也會作  
此語喜甚

葛長庚自號白玉蟾閩人也一云瓊州人居武夷山中  
嘉定間詔徵赴闕館太乙宮封紫清明道真人嘗至武  
昌賦酹江月懷古詞云漢江北瀉下長淮洗盡胸中今  
古樓櫓橫波征雁遠誰見魚龍夜舞鸚鵡洲雲鳳凰山  
月付與沙頭鷺功名何處年年惟見春絮非不豪似周

瑜壯如黃祖亦逐秋風度野草開花無限數渺在西山  
南浦黃鶴樓人赤烏年事江漢亭前路浮萍無據水天  
幾度朝暮

侯鯖錄云延安夫人係蘇丞相子容之妹也有寄李王  
妹更漏子詞云小闌干深院宇依舊當時別處朱戶鎖  
玉樓空一簾霜日紅弄珠江何處是望斷碧雲無際凝  
淚眼出重城隔溪羌笛聲

長安妓聶勝瓊歸李之問其寄李鷓鴣天詞云玉慘花

愁出鳳城蓮花樓下柳青青尊前一唱陽關曲別箇人  
人第五程尋好夢夢難成有誰知我此時情枕前淚共  
堦前雨隔箇窓兒滴到明

夷堅志載蓬萊仙人玉英浪淘沙詞云塞上早春時暖  
律猶微柳舒金線水圍隄料得江鄉應更好開盡梅蹊  
畫漏漸遲遲愁損香肌幾回無語斂雙眉凭遍闌干十  
二曲日下樓西

小璫英楊鐵崖伎也倪元鎮作柳梢青詞贈之云樓上

玉笙吹徹白露冷飛瓊珮  
玦黛淺含顰香殘栖夢子規啼  
月揚州往事荒涼有多少愁  
縈思結燕語空津鷗盟寒渚  
畫欄飄雪

能改齋漫錄云宣和間有女子  
幼卿題賣花聲詞于陝府驛  
壁云極目楚天空雲雨無蹤  
謾留遺恨鎖眉峯自是荷花  
開較晚孤負東風客館歎飄  
蓬聚散匆匆揚鞭那忍驟花  
驄望斷斜陽人不見滿袖啼  
紅

趙孟頫子昂宋太祖子秦王德芳之後也四世祖伯圭

賜第湖州遂為湖州人宋末為真州司戶叅軍至元中  
以程鉅夫薦授兵部郎中累官翰林學士承旨在李叔  
固丞相席間贈歌者貴貴浣溪沙詞云滿捧金卮低唱  
詞尊前再拜索新詩老夫慚愧鬢成絲羅袖染將修竹  
翠粉香頰上小梅枝相逢不是少年時公以承平王孫  
而遭世變故其詞不無麥秀校童之感

姚雲文聖瑞宋咸淳進士也入元為儒學提舉嘗過艮  
岳賦摸魚兒詞云渺人間蓬瀛何許一朝飛入梁苑輞



川梯洞層崖出猶帶鬼愁龍怨窮遊宴談笑裏金風吹  
折桃花扇翠華天遠悵沙沼螢粘錦屏烟合草露泣蒼  
蘚東華夢好在牙樯凋輦畫圖歷歷曾見落紅萬點孤  
臣淚斜日牛羊春晚摩雙眼看塵世鰲宮又報鯨波淺  
吟鞭拍斷便乞與媼皇化成精衛填不盡遺憾

淨慈尼宋舊宮人也羅志仁賦虞美人贈之云君王曾  
惜如花面往事多恩怨霓裳和淚換袈裟又送鑾輿北  
去聽琵琶當年未削青螺髻知是歸期未天花交室萬

緣空結綺臨春何處淚痕中

崑山顧阿瑛德輝同陳浩然遊觀音山宴張氏樓徐姬  
楚蘭佐酒以琵琶度曲郊雲臺心醉顧賦蝶戀花詞云  
春江暖漲桃花水畫舫珠簾載酒東風裡四面青山青  
似洗白雲不斷山中起過眼韶華渾有幾玉人纖手笑  
把琵琶理枉殺雲臺標外史斷腸只合江州死

名媛集載朱希真名秋娘適徐必用徐久客不歸朱賦  
菩薩蠻詞云濕雲不渡溪橋冷嫩寒初透東風景橋下

水聲長一枝和雪香人憐花似舊花比人應瘦莫凭小

關于夜深花正寒

花庵詞客云希真名教儒此則別是一人也

陳鳳儀成都樂妓也有一絡索詞送人云蜀江春色濃  
如霧擁雙旌歸去海棠也似別君難一點點啼紅雨此  
去馬蹄何處向沙堤新路禁林賜宴賞花時還憶著西  
樓否

王仲言云左譽字與言策名之後籍甚宦途錢塘幕府  
樂籍有名姝張芸女名穠色藝妙天下譽頗顧之如盈

盈秋水淡淡春山與一段離愁堪畫處橫風斜雨挹哀  
柳及惟雲剪水滴粉搓酥皆為穠作當時都人有曉風  
殘月柳三變滴粉搓酥左與言之對後穠委身立歎大  
將家易姓章疏封大國紹興中因覓官行闕暇日訪西  
湖兩山間忽逢車輿甚盛中覩一麗人褰簾顧盼而顰  
曰如今若把菱花照猶恐相逢是夢中視之乃穠也君  
恍然悟入即拂衣東渡一意空門其眼兒媚詞云樓上  
黃昏杏花寒斜月小闌干一雙燕子兩行征雁畫角聲

殘綺窓人在東風裏灑淚對春閨也應似舊盈盈秋水淡  
淡春山

無名氏女郎玉蝴蝶詞云為甚夜來添病強臨寶鏡憔悴嬌慵一任釵橫鬢亂永日薰風惱脂消榴紅徑裏羞  
玉減蝶粉叢中思悠悠垂簾獨坐倚遍熏籠朦朧玉人  
不見羅裁囊寄錦寫牋封約在春歸夏來依舊各西東  
粉墻花影來疑是羅帳雨夢斷成空最難忘屏邊瞥見  
野外相逢武林卓珂月云此詞當時甚為馬東籬張小

山諸君所服或曰洞天水作詳見玄之夢遊詞序中詞  
共十有八闋周勒山林下詞選錄其半

瞿士衡一日飲楊廉夫以鞋盃行酒廉夫命宗吉詠之  
宗吉席上作沁園春以呈廉夫大喜即命侍妓歌以侑  
觴因袖其稿以去詞云一掬嬌春弓樣新裁蓮步未移  
笑書生量窄愛渠儘小主人情重酌我休遲醞釀朝雲  
斟量暮雨能使麴生風味奇何須去向花塵留蹟月地  
偷期風流到手偏宜便豪吸雄吞不用辭任凌波南浦

惟誇羅襪賞花上苑祇勸金卮羅帕高擎銀瓶低注絕  
勝翠裙深掩時華筵散奈此心先醉此恨誰知

松江俞俊弱冠從顧淵白遊負氣傲物當巴延太師柄  
國日嘗賦清平樂長短句云君恩如草秋至還枯槁落  
落殘星猶弄曉豪傑消磨盡了故開湖海襟懷休教鷗  
鷺驚猜我是江南倦客等閒容易安排手藁留葉起之  
處後與葉交惡竟訴于官欲構其罪夤緣賄賂獲免  
永樂間瞿宗吉以詩禍下獄已而謫戍保安時興河失

守邊境蕭然朝廷方降佛曲于塞下選子弟唱之遇元  
宵宗吉淒然作望江南五首云元宵景野燒照山明風  
陣摩天將夜半斗杓插地過初更燈火憶杭城元宵景  
巷陌少人行舍北孤兒偎冷炕牆東嫠婦哭寒檠士女  
憶杭城元宵景刁斗擊殘更數點夕烽明遠戍幾聲寒  
角響空營歌舞憶杭城元宵景獨坐自傷情破甑三杯  
黃米酒寒窓一盞濁油燈宴坐憶杭城元宵景淡月伴  
疎星戍卒抱關敲木柝歌童穿市唱金經簫鼓憶杭城



永樂中秋上方開宴賞月月為雲掩召解縉賦詩遂口  
占風落梅一闋其詞曰姮娥面今夜圓下雲簾不着臣  
見拚今宵倚闌不去眠看誰過廣寒宮殿上覽之歡甚  
又賦長篇上益喜同縉飲過夜半月復明朗上大笑曰  
子才真可謂奪天手段也

成化間仁和教諭聶大年以詩書名世人來乞書多以  
東坡行香子馬晉滿庭芳應之二詞一言不必深求學  
問一言仕宦亦勞皆不如隱逸之樂也後聶召至京修

史而死貧不能斂似若預為已言者然二詞亦果痛快  
今錄之行香子云清夜無塵月色如銀酒斟時須滿十  
分浮名浮利休苦勞神歎隙中駒石中火夢中身雖抱  
文章開口誰親且陶陶樂盡天真不如歸去做個閒人  
對一張琴一壺酒一溪雲滿庭芳云雪漬疎髯霜侵衰  
鬢去年猶勝今年一回老矣堪嘆又堪憐思昔青春美  
景除非是月下花前誰知金章紫綬多少事憂煎侵晨  
騎馬出風初暴橫雨又淒然想山翁野叟正爾高眠更

有紅塵赤日也不到松下林邊如何好吳松江上聞了  
釣魚船馬晉字孟昭明初吳下人也

朱竹古無所本起于明初宋仲溫有一卷不知何人筆  
高季迪題水龍吟云淇園丹鳳飛來幾時留得參差翼  
簫聲吹斷彩雲忽墮碧雲猶隔想是湘靈淚彈多處血  
痕都積看蕭疎瘦影隔簾欲動應是落花狼籍莫道清  
高也俗再相逢子猷還惜此君未老歲寒猶有少年顏  
色誰把珊瑚和烟換去琅玕千尺細看來不是天工却

是邨春風筆此卷舊為王太史家物徐惟和收得之珍  
若重寶自題其後云根如頰虬髯葉如丹鳳尾有時截  
作釣魚竿珊瑚亂拂桃花水有時擲杖化為龍白日青  
天赤鱗起能將紅霧變蒼煙產在朱明幾洞天須臾絳  
節生彤管只向松間滴露妍

高郵王槃作野菜譜并綴以詞雅俗相雜山家之公案  
也嘉禾周履靖作茹草編亦效西樓而起編中詠燕子  
不來香云新蒲正短舊壘猶空繡箔朱簾面面風粘天

芳草碧玉茸茸趁呢喃聲杳曉摘芳叢昭陽殿裏妬綠  
嫌紅無奈香消一盼中

夏侯橋沈潤卿掘地得宋高宗賜岳侯手勅石刻文徵  
明待詔題滿江紅詞云拂拭殘碑敕飛字依稀堪讀慨  
當初倚飛何重後來何酷豈是功成身合死可憐事去  
言難贖最無端堪恨又堪悲風波獄豈不念封疆蹙豈  
不念徽欽辱念徽欽既返此身何屬千載休談南渡錯  
當時自怕中原復笑區區一檜亦何能達其欲激昂感

慨自具論古隻眼後宋改謚岳忠武文云李將軍口不  
出辭聞者流涕蘭相如身雖已死凜然猶生又云孔明  
志興漢室子儀光復唐都不嫌今古同辭將與河山並  
久唯岳侯為能不愧此謚予嘗至鄂王墳上賦一詩云  
帆挂西泠隱畫橈岳王墳上草蕭蕭頻年羌笛吹孤月  
盡日垂楊鎖六橋石馬夜嘶荒殿雨水犀春漲浙江潮  
登臨休問前朝事只有南枝恨未消

吳江張倩倩適同邑沈自徵自徵負才任俠所著霸亭

秋鞭歌妓簪花髻詞三齣名漁陽三弄與徐文長並傳  
倩倩有憶秦娥云風雨咽鷓鴣啼破清明節清明節杏  
花零落悶懷千疊情悰依舊和誰說眉山鬬鎖空愁絕  
空愁絕雨聲和淚問誰淒切填詞集艷云倩倩艷色清  
才年才三十四歿遺香僅存一二

詞苑叢談卷八



欽定四庫全書

詞苑叢談卷九

翰林院檢討徐鉉撰

紀事四

龔定山尚書與橫波夫人月夜汎舟西湖作醜奴兒令  
四闋自序云五月十四夜湖風酣暢月明如洗繁星盡  
斂天水一碧偕內人繫艇子於寓樓下剝菱煮芡小飲  
達曙人聲既絕樓臺燈火周視悄然惟四山蒼翠時時

滴入杯底千百年西湖今夕始獨為吾有徘徊顧戀不  
謂人世也酒語情怙因口占四調以紀其事子瞻云何  
地無月但少閒人如吾兩人予則謂何地無閒人無事  
尋事如吾兩人者未易多得爾詞云一湖風漾當樓月  
涼滿人間我與青山冷澹相看不等閒藕花社榜疎狂  
約綠酒朱顏放進嬋娟今夜紗窗可忍關又云木蘭掀  
蕩波光碎人似乘潮何處吹簫輕逐流螢度畫橋白鷗  
睡熟金鈴悄好是蕭條多謝雙篙折簡明宵不用招又

云情癡每語銀蟾約見了銷魂爾許溫存領受嫦娥一  
笑恩戲拈梅子橫波打越樣心疼和月須吞省得濃香  
不閉門又云清輝依約雲鬟綠水作菱花蘓小天斜不  
見留人駐晚車湖山符牒誰能管讓與天涯如此豪華  
除却芳樽一味賒

葉天寥虞部半不軒留事云僊僊十三四時即羈迹秦  
淮將有錦江玉壘之行遠望故鄉淒心掩泣真所云侯  
門一入深如海也余甚傷焉今年十七又作巫山神女

向楚王臺下去矣酒間聞之悵然感懷口占浣溪沙二  
詞云一片歸心望也休西陵千里水東流杜鵑芳草楚  
天秋老去未消風月恨閑來重結雨雲愁欲緘雙淚寄  
亭州又金粉傷情別石頭六朝煙柳繫離憂破瓜人泣  
仲宣樓桃葉渡邊春易去梅花笛裏夢難留子規斜月  
一悠悠

俞琬綸製桂枝香古鏡詞贈女史顧文英琬綸自序云  
文英善書以碧絲作小行楷綉之鏡囊遺所歡後有人

蠲二千金娶之未幾英死一夕予夢英相對如常謝此  
詞予曰殊悔有架罷殘粧二語遂為卿識英曰比亦竊  
疑之愛其佳不請易耳其詞云張郎一去君且代郎看  
雙蛾解理贈別躊躇不忍把君分碎問容顏君獨知  
憔悴受多磨與君無異廣寒三五嫦娥愁向却元自己  
晴空裡似丹青點綴箇中小小洞天深處背地沈迷  
形影都無據憐君自為分明累貯盡了漢宮人淚架  
罷殘粧瞥然收却遠山橫翠

吳祭酒作秣陵春一名雙影記嘗寒夜命小鬟歌演自  
賦金人捧露盤詞云記當年曾供奉舊霓裳嘆茂陵遺  
事淒涼酒旗戲鼓買花簪帽一春狂綠楊池館逢高會  
身在他鄉喜新詞初填就無限恨斷人腸為知音仔細  
思量偷聲減字畫堂高燭弄絲簧夜深風月催檀板顧  
曲周郎時祭酒將復出山晉江黃東崖詩云徵書鄭重  
眠餐損法曲淒涼涕淚橫正謂此詞也祭酒又自題一  
律云詞客哀吟石子岡鷓鴣清怨月如霜西宮舊事餘

殘夢南內新詞總斷腸  
漫濕青衫陪白傅  
好吹玉笛問寧王  
重翻天寶梨園曲  
減字偷聲柳七郎

楊邉君字雲和沈君善之側室工於繡  
佛名流多題詠之作君善輯針史行世  
其女關關字宮音尤能出新意所繡山水  
人物無不精絕嘗墨繡顧茂倫濯足圖尤  
悔庵題漁家傲一闕其詞云我夢吳江煙  
水皺綸竿擬挂垂虹口不道逋翁濯足久  
枕且漱滄浪一曲天如斗深院玉人閒譜  
繡粉香妙寫溪山友宛轉絲絲盤素手林

下秀小名獨占毛詩首

廣陵有老儒孿生二女子娟娟相倚雅好文墨幼時並處不能辨以香炙面為識戊戌年訛傳掖庭之選倉卒歸二少年一居城一居湖中嫁同日後皆有娠復同病而卒閭再彭修齡賦漁家傲詞弔之云畫鎖紗窗縈碧霧瓊花自是無雙樹並蒂嬌姿無解語經行處花鈿暗識脩眉嫵畫閣肩垂朝復暮閒情時咏遊僊句奔月花煙留不住天風度飛瓊自挽雙成去詞載倚聲集人多



傳之

紅橋在平山堂法海寺之側王貽上司理揚州日與諸  
名士遊讌酒間小有倡酬江南北頗流傳之於是過廣  
陵者多問紅橋矣司理在紅橋賦浣溪沙云北郭清溪  
一帶流紅橋風物眼中秋綠楊城郭是揚州西望雷塘  
何處是香魂零落使人愁澹煙芳草舊迷樓茶村杜濬  
和云六月紅橋漲欲流荷花荷葉幾時秋誰翻水調唱  
涼州更欲放船何處去平山堂上古今愁不如歌笑十

三樓淮陰丘象隨和云清淺雷塘水不流幾聲寒笛畫  
城秋紅橋猶自倚揚州五夜香昏殘月夢六宮釵落曉  
風愁多情煙樹戀迷樓後陽羨陳維崧賦紅橋詩云輕  
紅橋上立逡巡綠水微波漸作鱗手把柳絲無一語十  
年春恨細如塵又一帶蕪城織野煙三春板渚亂寒田  
傷心錯到平山路不獨江南事可憐又雨餘垂柳鴨頭  
綠日落吳天卯色紅絕似儂家罨畫裡幾層春水幾層  
風余亦有紅橋絕句云酒樓楊柳碧絲絲慳煞紅裯舞

柘枝留得狂名偏薄倖至今猶說杜分司又轉過春帘  
便板橋船牕草閣雨瀟瀟蕪城一片寒煙織流水何人  
問六朝人多誦之附錄阮亭遊記畧云出鎮淮門循小  
秦淮折而北陂岸起伏多態竹木蓊鬱清流映帶人家  
多因水為園亭榭溪塘幽窈而明瑟頗盡四時之美拏  
小艇循河西北行林木盡處有橋宛然如垂虹下飲於  
澗又如麗人靚粧絃服流照明鏡中所謂虹橋也遊人  
登平山堂率至法海寺捨舟而陸徑必出虹橋下橋四

面皆人家荷塘六七月間茁茁作花香聞數里青簾白舫絡繹如織良謂勝遊矣

秦淮卞賽小字玉京桃葉名姬也後為女道士吳祭酒琴河感舊詩有青山憔悴卿憐我紅粉飄零我憶卿之句不勝樓頭燕子山上蘼蕪之感彭城萬年少壽祺賦眼兒眉贈之云花弄香紋春滿樓桃葉引江流箇人何事斜陽獨倚曲曲腸柔垂簾淡淡撲楊毬私心好處投侍兒斂態閉門作意不上金鈎蓋記其少年情事猶覺

風韻可人

葉天寥治史云沈智瑤內人季妹也鸝吹五君詠珠暉  
映月流玉彩迎花度可以想見風格矣有詩刻彤奩續  
些年三十餘以怨恨自沈於水而死俗婦蘭支其內姪  
女也有詞哭之調寄水龍吟云水晶深處瓊樓湘風半  
捲鮫綃軟桂旗翠陌平沙碧草瑤天煙煖寶柱哀絃曲  
終人杳晚江清淺奈芳菲極目雲霞未賞都倩靈妃遊  
伴寂寞楚山高遠夜半猿聲淚痕滿鏡消菱月釵沈蘭

霧霎時分散恨逐波香愁隨浪影一天幽懣歎消魂正  
是白蘋黃葉暮鴻淒斷

沈宜修宛君天寥夫人也三女紈紈小紈小鸞皆工詩  
詞有午夢堂集數種曰昔和凝有句云春思翻教阿母  
疑余以為破瓜之年亦何須疑直是當信耳因作問疑  
詞云芳草青歸梨花白潤春風又入昭陽鬢繡窻日靜  
綺羅閒金鈿二八人如薜碧字題眉細香寫暈青鸞玉  
線裙榴襯若教阿母不須疑粧臺試向飛瓊問

天寥又有侍女隨春年十三四即有玉膚肌凝積雪韻  
彷彿花笑盼之餘風情飛逗瓊章極喜之為作浣溪沙  
詞云欲比飛花態更輕低回紅頰背銀屏半嬌斜倚似  
含情嗔帶淡霞籠白雪語偷新燕怯黃鶯不勝力弱懶  
調箏昭齊和云翠黛新描桂葉輕柳枝婀娜倚蓮屏風  
前閒立不勝情細語嬌誦嗔亂蝶清臚淚粉怨殘鶯日  
長深院惱秦箏蕙綢和云髻薄金釵半鞦輕佻羞微笑  
隱湘屏嫩紅染面作多情長怨曲欄看關鴨慣嗔南陌

聽啼鶯月明簾下理瑤箏宛君和云袖惹飛煙綠雨輕  
翠裙拖出粉雲屏飄殘柳絮暗知情千喚懶回拋繡鴻  
半含微吐澁新鶯嗔人無賴戛風箏諸詞俱用嗔字以  
此女善嗔嘗面發赤也宛君又有長愛嬌嗔人不識水  
剪雙眸欲滴之句余亦作二闋云初總銀篦攏髻輕添  
香朝拂美人屏生來腴腆自風情淺麝翠分明月雁小  
檀黃入曉春鶯故憐斜撥學新箏紅袖垂鬟旖旎輕闌  
干閒倚杏花屏半將嗔語寄深情金釧粉痕香畫鳳玉



叙脂膩滑流鶯坐來簾下即彈箏

按隨春一名紅于葉小鶯侍妾也鶯歿後

歸龐氏別字元元龐蕙線有病中聞家慈同元姨為予  
誦經誌感鷓鴣天云終歲慙慙怯往還盈盈兩袖淚痕  
潛一心解織愁千縷雙鬢慵梳月半彎鶯被冷瑣窗寒  
翻經畫閣懺紅顏枕函稽首殷勤意不盡箋題寄小鬟

見林下  
詞選

柳亭沈適聲豐垣任情縱誕中年因所歡遂被放黜嘗  
賦踏莎行一闕亦惜分飛遺意也其自序云星移物換  
人世皆虛梗逝蓬飄吾生靡定是以求仙學佛羣笑為  
迂飲酒被紉元非過激聊蟄龍而伸蠓或呼馬以應牛

僕本有情兼遭多難秋風大澤情殊屈子之悲春水橫  
橋恨學尾生之信雙珠待握一劍驚飛王孫之草徒芳  
姊妹之花半死天高離恨總喚奈何鄉老溫柔翻為醉  
夢佯狂自廢啼則襟袖多淹惆恍如癡笑則冠纓欲絕  
然而佳人不再淑儷難雙未曾斷藕蓮復生心縱是枯  
楊絮還惹恨但使小家碧玉終嫁汝南趙國才人不歸  
廝養則雖葦門陋巷敵金屋之繁華沁水流泉勝瓊漿  
之雋永夜窺石鏡朝起藜床寧懷憤鼻之慚豈下牛衣

之泣無如薄命空復多愁腸無瓶綆侵曉還牽腹有車  
輪何時不轉書空靡益說鬼偏宜且寄興於小詞即徵  
歌於長恨詞曰積雨埋紅沈煙漾碧小樓春信催寒食  
踏青鬪草總無心自家憔悴誰憐惜枉裂香羅虛勞黛  
筆東風笑殺多情客瑤琴元不是知音一床夜月吹羌  
笛

歌者張郎今日之秦青也壬子春暮讌集於宋荔裳觀  
察京師寓園張後至合肥宗伯賦蝶戀花詞云春絆情

絲千縷。夢裡人來乍暖輕寒節。何處玉驄曾小歇。海棠飄落胭脂雪。重倩紅牙溫舊闕。張緒風前好是腰身絕。樓閣水明光四徹。羅衣影漾波心月。又送張還廣陵云。紅淚一巾心百縷。春盡纔逢剛過菖蒲節。懊恨子規啼不歇。生生催就雙蓬雪。莫聽陽關朝雨闕。禁得年年腸為分。攜絕芳草粘天難望徹。杏花人面揚州月。又代張閨情云。綵線鴛鴦愁暗縷。花雨新添水暖銀塘節。燕穿簾飛又歇。冰紈貼芙蓉雪。悶倚玉簫吹半闕。報

道人歸喜極還嗔絕別後心情明鏡徹日長捱到如年  
月又隋苑煙花羅綺纈小別重圓交代歡愁節腸轉車  
輪輪始歇夢回關塞沙如雪為問歡場歌幾闋比並雙  
蛾畫就誰嬌絕天欲為人須為徹一生長似團圓月長  
安諸公爭裂素紈書之於是紅牙檀板中都唱此詞

朱錫鬯彞尊在代州與妓小字白狗者狎一日晚往訪  
之不值戲投一詞云疎籬日影纔鋪地却早被金鈴喚  
起朝雲一片出巫山盼不到黃牛峽裏仙源乍入重門

閉任閒殺桃花春水劉郎自去阮郎歸算只有相如伴  
你蓋步蟾宮調也錫鬯天才踔厲詩文膾炙海內填詞  
與柳七黃九爭勝葉元禮嘗作駢體文序之綴以絕句  
云鴛鴦湖口推朱十代北汶西詞客哀弄墨偶然工小  
令人間腸斷賀方回

京師舊俗婦女多以元宵一夜出遊名走橋摸正陽門  
釘以袂除不祥亦名走百病予向欲填一詞記之近見  
青城集中木蘭花令正咏此也句頗雅麗詞云元宵昨

夜嬉遊路今夕還從橋下去名香新暖繡羅襦翠帶低垂金線縷回頭姊妹多私語魚鑰沈沈纖手拄釵橫髻

嬋影參差一片花光無處所

青城集嘉善魏子存著海寧陳相國夫人徐燦字

湘蘋有燕京元夜詞云華燈看罷移香屣正御陌遊塵絕素裳粉袂玉為客人月都無分別丹樓雲淡金門霜冷纖手摩娑怯三橋宛轉凌波躡斂翠黛低回說年年長向鳳城遊曾望蕊珠宮闕星橋雲爛火城日近踏遍月天街

淮陽柳敬亭以淳于滑稽之雄為左寧南幸舍重客寧南沒於九江舟中柳先生期東下憔悴失路垂老客於

長安龍松先生贈賀新郎詞云鶴髮開元叟也來看荆  
高市上賣漿屠狗萬里風霜吹短褐遊戲侯門趨走卿  
與我周旋良久綠鬢紅顏今盡改嘆婆婆人似桓公柳  
空擊碎唾壺口江東折戟沈沙後過青溪笛床煙月淚  
珠盈斗老矣耐煩如許事且坐旗亭呼酒拚殘臘消磨  
紅友花壓城南韋杜曲問毬場馬稍還能否斜日外一  
回首又賦沁園春云驃騎將軍異姓諸侯功名壯哉乍  
南樓傳箭大航風鶴中流搖櫓湓浦蒿萊片語回春千



金逃賞遮客長刀玩弄來堪憐處有恩門一涕青史難  
埋偶然座上嘲詆博黃絹新詞七步才似籌兵北府碧  
油晨啓把棊東閣屐齒宵陪春水方生吾當速去老子  
遨遊頗見哀相攜手儘山川六代簫鼓千杯聽恩門一  
涕之語直是敬亭知已

出湧金門沿湖為錢王祠免葵燕麥瓦礫荆榛瓣香長  
絕余過而感之題滿江紅一闋於壁上云電馬霜戈馳  
江上怒濤始歇誇保障并吞割據韓彭比烈寂寞幾堆

羊虎石淒涼一片銅駝月憶白鹽擔裡是何人關情切  
故宮內餘殘雪荒廟裡靈旗滅笑宋家南渡金甌也缺  
五國未曾生馬角五王莫漫啼鵲血算原來天道好循  
環悲雙闕亦陳橋驛孤兒寡婦久假當還意也

葉元禮舒崇客西泠遇雲兒於宋觀察席上一見留情  
時尚未破瓜也雲兒居孤山別墅密簡相邀訂終身焉  
別五年復至湖頭則如綵雲飛散不可踪跡矣元禮撫  
今追昔情不自禁援筆賦浣溪沙四闋云彷彿清溪似

若耶底須惆悵怨天涯青驄繫處是儂家生小畫眉分  
細繭近來綰髻學靈蛇粧成不耐合歡花又柳暖花寒  
懊惱時春情脉脉倩誰知廉纖香雨正如絲團就鏡臺  
烏鰂墨寄來江上鯉魚詞此生有分是相思又潛背紅  
窻解珮遲銷魂爾許月明時羅裙消息落花知蝶粉蜂  
黃拚付與淺顰深笑總難知教人何處懺情痴又斗帳  
脂香夜半侵幾番絮語夢難尋清波一樣淚痕深南浦  
鶯花新別恨西陵松柏舊同心一番生受到而今

壬子元宵吳荆西之紀沈龍門永令合樂玉樹堂名士  
勝流無不畢集花燈火樹稱為極盛校書芳蓀雲間人  
色藝獨絕時微雨無月羣呼曰嫦娥何在耶吳玉川鏘  
笑曰咫尺雲間何云不見遂調畫堂春一闕云佳節姮  
娥不放閒只看燈影團圞更闌薄醉顰雙鬟無限屏山  
妬煞一天風雨玉簫錦瑟生寒清光咫尺在雲間倚遍  
欄干席上有老樂工沈遂譜入管絃即為歌唱極歡而  
罷其詞傳播揚州宗定九元鼎刻之花鈿集中

浙中查伊璜妙解音律其家姬柔些尤擅絕一時廣陵  
汪舍人蛟門製春風袅娜遺查君兼贈柔些云看先生  
老矣兀自風流圍翠袖昵紅樓羨香山攜得小蠻樊素  
玉簫金管到處遨遊舞愛前溪歌憐子夜記曲娘還數  
阿柔戲罷更教彈絕調穉穉端坐撥箏篴新製南唐院  
本衣冠巾幘抵多少優孟春秋拖六幅掩雙鉤英雄意  
態兒女嬌羞燈下紅兒真堪消恨花前碧玉耐可忘憂  
是鄉足老任悠悠世事爛羊作尉屠狗封侯同郡小香

居士宗定九和云憶年前度曲無限嬌愁花未放蕊還羞洞簫聲駛馭酒濃春蕩無端牽惹情緒難由裊娜衣裳六朝宮樣傾國傾城看阿柔我慕香山白居易也曾絃管識荊州此日汪郎才子新詞填就問端委十二層樓珠繚繞玉雕鏤燈前席上巫水江頭鶯滾含桃昔憐將熟兔團月桂今勝如鉤伊人信美況西園公子英雄曠達寄興瑩篴觀二詞可以知柔些風度矣

吳玉川夫人龐小畹蕙纈詩詞書法擅絕當世片紙隻

字莫不珍惜有青蓮女伎小青者色藝皆精嘗演劇復  
復堂持扇叩唾香閣乞書夫人即調桂枝香一闋有浪  
萍飛絮前生果別是傷心一小青之句一時傳誦青亦  
憮然自失遂有意脫籍

沈素嘉葉蕙綢女歸中表葉學山居與龐小畹比隣後  
移居汾湖有寄吳夫人小畹點絳唇曰隔箇牆頭幾番  
同聽黃昏雨別來情緒向北看春樹一院藤花底是臨  
書處還記取綠窻朱戶裊裊茶煙縷小畹次韻云十載

芳隣自憐一別還如雨看雲愁緒隔箇江天樹佳句曾  
題小楷紅箋處頻看取相思何限一瞬情千縷

長沙女子王素音有可憐魂魄無歸處應向枝頭化杜  
鵑之句辭旨酸楚王司州士禎用其意作減字木蘭花  
弔之云離愁滿眼日落長沙秋色遠湘竹湘花腸斷南  
雲是妾家掩啼空驛魂化杜鵑無氣力鄉思難裁楚女  
樓空楚雁來

桐城方太史納姬合肥龔中丞賦燭影搖紅催粧詞詞



既織穠序尤綺麗今載香嚴集中序云何來才子自負  
多情選艷花叢既眼苛於冀北效顰桃葉空夢遶於江  
南無處尋愁歌燕市酒人之曲有官割肉慳金門少婦  
之緣願得一心合為雙璧今且窮搜粉譜恰遇麗姝綰  
髻相思能誦義山之句投珠未嫁欣挑客座之琴眉黛  
若遠山臉際若芙蓉風流放誕驚絕世之佳人玉釵挂  
臣冠羅袖拂臣衣微笑遷延快上國之公子錦茵角枕  
良夜未央白雪幽蘭新懽方洽兼以花杵月拍並是慧

心壁版烏絲時呈纖手搯玉堂之紅藥比金屋之奇姿  
可謂勝絕一時風華千載者矣昔宋玉口多微詞自許  
溫柔之祖而其告楚王曰天下之美無如臣里臣里無  
如東家之子嘻何隘也燕趙多佳夙驚名貴文鴛擇棲  
未肯匹凡鳥耳豈必聽子夜於吳趨載莫愁於煙艇乃  
稱雅合哉詞云一揖芙蓉閒情亂似春雲髮凌波背立  
笑無聲學見生人法此夕歡娛幾許換新粧佯羞淺答  
算來好夢總為今番被他猜殺宛轉菱花眉峯小映紅

潮發香肩生就靠檀郎睡起還凭榻記取同心帶子雙  
雙綰輕綃尺八畫樓南畔有分鴛鴦預憑錦札

青兒者楊中丞家妓也適毘陵董氏為青衣婦嗟哉惟  
悴矣猶記旗亭舊曲一日文友宴客因索清歌青兒掩  
抑自傷遷延不出促之至再始發聲其音瑟瑟似在潯  
陽江上時文友賦愁春未醒一闋以傷之詞云千金不  
惜歌舞教成似燕離巢後呢喃猶作畫梁聲自分年踰  
絃索笙簫讓後生今宵何事重聞呼喚幾度如醒欲奏

清音花檀乍拍淚已盈盈我幸非牙郎買絹不受伊輕  
但覺歌餘蘆花楓葉滿中庭不知可似白家老嫗舊日  
聞名陽羨生和青兒曲云檀槽尚撥仙帔初成似沙場  
老将醉來偏喜楚歌聲隔著屏風舊恨新愁指下生當  
年此際額黃嬌暈紅粉羞醒樂府嬌嬈從來屬董何必  
盈盈但越公朱門何在玉瘦花輕分付歌奴休將臨本  
笑黃庭須知一樣悞卿絕世老我虛名二詞成座客聞  
之都不樂羅江東云我未成名卿未嫁可能俱是不如

人紅粉飄零才人老大安能無杜秋之悲江州之泣也  
尤悔庵云僕嘗客恒山梁司徒公出家伎佐酒僕於座  
上演清平調雜劇即令小鬟歌之公賦菩薩蠻詞云樽  
前若個歌金縷盈盈十五芳如許笑靨半含羞驕憨不  
解愁眉痕青尚淺秋水雙眸剪何處耐人思歌停掩袖  
時座客爭為傳唱極歡而罷

梁司徒伎有名文王者最姝麗嘗裝淮陰侯故事悔菴  
於席上調南鄉子詞贈之云珠箔舞蠻韉淺立鸛鼈宛

轉歌忽換猩袍紅燭艷  
熊科錦繖將軍小黛蛾  
鬢髮尚盤螺一辮絲鞭  
燕尾拖為待情人親解  
取誰何春草江南細馬  
馱蓋晉女未字者髻後  
垂辮解辮則破爪矣司  
徒見詞大喜命文玉酌  
叵羅再拜以獻盡醉而  
歸

王胥庭司馬張伎設讌  
棠村梁公賦春風裊娜  
云喜良宵煙月依舊清  
平花市暖晚風輕有尚  
書好客堂開簾捲故人  
歡笑妝點春城百寶珠  
輪九枝青玉絳燭高燒  
列畫屏琥珀光浮千日  
酒赤瑛盤薦五侯鯖誰  
把燕山

舊事移宮換羽倩優孟譜入新聲紅牙串紫鸞笙歌喉  
未歇客欲沾纓夢裡功勛休嗟陳跡眼前盃酌且盡平  
生種槐庭院看年年無恙紅燈綠醕快聚良朋時華堂  
竹肉間發聽歌者唱至看年年無恙紅燈綠酒快聚良  
朋之句舉座起舞

汪鈍翁題梁曰緝江村讀書圖云鄆陵野色平於掌也  
有江南此景無王阮亭見之呵曰吳子輩乃爾輕薄汪  
笑曰行當及君矣因續嘲阮亭所題云彷彿春江綠樹

陰幾回展卷幾沈吟江南於汝關何事賦得愁心爾許  
深汪固輕薄然余嘗見陽羨陳髯望江南數闕風景情  
事如畫讀之不得不令人轉憶江南樂也其詞云江南  
憶憶得上元時人鬪南唐金葉子街飛北宋鬧蛾兒此  
夜不勝思江南憶最憶善和坊猿臂醉擎劉白墮鶯喉  
嬌唱小秦王花月去堂堂江南憶少小住長洲夜火千  
家紅杏幙春衫十里綠楊樓頭白想重遊江南憶白下  
最堪憐東冶壁人新訣絕南朝玉樹舊因緣秋雨蔣山



前江南憶懊惱是西湖秋月春花錢又趙青山綠水越連  
吳往事只糝糊江南憶更憶是蕪城蘭葉寒塘盤馬路梨  
花微雨築毬聲風景逼清明江南憶最好是清歌一曲琵  
琶彈賀老三更絃索響柔奴此事艷東吳江南憶畫最  
風流白屋山腰煙內市紅關水面雨中樓樓上漾簾鉤

望春樓故邱在青州丁葯園祠部入關後偶遊山左來  
尋舊址覩蔓草零煙不勝華清宮闕之感賦玉女搖  
僊珮一闕令故妓歌之聽者恍如置身津陽門外

奉誠園內也詞云青州城裡帝子珠樓縹緲五雲深  
際繞柱鮫綃穿簾玳瑁舊是繁華朱邸誰意同流水見  
移花月檻落榆鋪地玉階外鳥聲唧軋雨洗遺鈿數點  
空翠何處鳳簫聲暗想當年玉容同倚樓上望春如醉  
風斷窻紗燕子銜將花蘂鬪草踏青昭陽人去冷落鞦韆  
佳會飛絮連天起笙歌杳不道岐王故第祇見得空  
梁蛛網粉牆蝶鬧但餘幾點看花淚不如把鳳樓長閉  
宋觀察荔裳罷官遊西湖與鐵崖顧菴西樵宴集演耶

鄆夢傳奇觀察曰殆為余輩寫照也即席賦滿江紅云  
古陌邯鄲輪蹄路紅塵飛漲恰半晌廬生醒矣龜茲無  
恙三島神仙遊戲外百年卿相遽廬上歎人間難孰是  
黃梁誰能餉滄海曲桃花漾茅店內黃雞唱閱今來古  
往一杯新釀蒲類海邊征伐碣雲陽市上修羅杖笑吾  
儕半本未收場如斯狀詞成座客傳觀屬和為之歛歔  
罷酒

曹顧庵學士詩詞流播海內已三十年辛亥復遊京國

與同志唱酬意氣凌霄精力扛鼎新詞一出小胥競寫  
余嘗見其京華詞集觀女伶高陽臺一闋云鶯舌新調  
鴉鬟猶鞞湘裙欲整還拖懶散心情朝來愁畫雙蛾風  
約繡簾搖樺燭對菱花倦眼生波儘嬌憨動人些子元  
不爭多魂銷一曲清歌却似曾相識無可如何影好難  
描空勞石墨三螺燈前小立紅粧換笑還嗔喚弟稱哥  
暗相憐細腰無力又著蠻靴未知女伶何人知學士猶  
有白傅情懷也余在西陵賦沁園春寄之云金馬銅龍

游戲當時犢車入燕看禁煙藏柳鶯啼舊樹玉河浸月  
雁訴遙天華轂朱門白衣蒼犬田實紛紜絕可憐歸來  
好有陶家松菊謝傅林泉舊遊景物依然倩紉扇新詞  
記往年想漳水臺空梁園鄴下華清夢短杜曲樊川無  
數紅牙一羣腰鼓秋水春颿書畫船重來此聽黃鸝細  
囀坡老堤邊

廣陵冒巢民家青童紫雲僮巧善歌與陽羨陳其年狎  
其年為畫雲郎小照徧索題句新城王阮亭曰黃金屈

滕王交盃坐燼銀荷葉上灰法曲自從天上得人間那  
識紫雲迴武進陳椒峯曰憶脫春衫花底眠新聲愛殺  
李延年只今展卷人猶在何處相看不可憐長洲尤悔  
庵曰西園公子綺筵開壁月瓊枝夜夜來小部音聲誰  
第一玉簫先秦紫雲迴於是和者幾數十人一日雲郎  
合盞其年賦賀新郎贈之云小酌醑醑釀喜今朝釵光  
簾影燈前滉漾隔著屏風喧笑語報道雀翹初上又悄  
把檀奴偷相撲朔雌雄渾不辨但臨風私取春弓量送

爾去揭鴛帳六年孤館相依傍最難忘紅蕤枕畔淚花  
輕颺了爾一生花燭事宛轉婦隨夫唱努力做藁砧模  
樣只我羅衾渾似鍊擁桃笙難得紗窗亮休為我再惆  
悵人傳努力做藁砧模樣句無不絕倒

陳其年既失意無聊嘗賦悵悵詞云吐汝青衫奚不去  
白楊荒漠歎是處病蘭不笑瘦琴空削鄴酒紅來心久  
死越娘紫去懷長惡猛耳酣追憶玉箋河驚流落東簫  
屐西紉芍北金谷南銅雀只詞流騷艷供伊談噓百不

憐人游獵賦一生悞我靈光作向要離塚上以呼余余  
曰諾又云日夕此間以眼淚洗胭脂面誰復惜松螺脚  
短不堪君薦幾帙罵人鸚鵡著半床詛世芙蓉譏笑嶽  
寄狹骨縛青衫奚其便曷不向清河戰曷不向青樓宴  
問何為潦倒青藜筆硯老大怕逢裘馬輩顛狂合入煙  
花院誓從今傅粉上鬚眉簪歌釧又云白柳黃羊宛繪  
出傷心片幅酸切處短霜供爨古煙供讀觴弄於君何  
必怒飄浮似我原堪哭聽黃陵磯畔夜深船淒涼曲梨



園內絲憎肉田園內花欺粟更泉麻謗錦蕢蔬讒菊百  
隊錢刀爭作橫一身風雅單為僕倚酒悲亂擊紫珊瑚  
鳴如筑涉筆騷怨鳴咽王司州阮亭見之大為嘆絕

王司勳倩蕭靈曦畫水晶簾下看梳頭圖余嘗見之點  
染精絕陳散木世祥為題夏初臨詞云悄意難描幽情  
誰見久無人賦雙文梧影單衫閒中驗取腰身蕭生作  
意經營寫濃香不著些顰曾波橫溜淺櫻忍笑活現伊  
人畫簾小暇粧閣清歡釵邊翠滑鏡裡紅分歌床凝睇

金少卿集卷九  
心苗全染幽芬道不銷魂相看處遞盡溫存問真真他  
年好憶月想花因

曲中陳九老教師也其子陳郎亦善歌以扇索陽羨生  
書生為題滿江紅一闋云鐵笛鈿箏還記得白頭陳九  
曾消受妓堂絲管毬場花酒籍福無雙丞相客善才第  
一琵琶手歎今朝寒食草青青人何有弱息在佳兒又  
玉山皎瓊枝秀喜門風不墜家聲依舊生子何須李亞  
子少年當學王曇首對君家兩世濕青衫吾衰醜

白生名珏字璧雙通州人琵琶第一手吳梅村為作琵琶行陽羨生詩玉熙宮外綠垣平盧女門前野草生一曲紅鹽數行淚江南祭酒不勝情正為璧雙作也一日抱琵琶至冒巢民水繪庵撥弦按拍宛轉作陳隋數弄陽羨生又賦摸魚兒一闋倚絃歌之聽者皆淒然泣下其詞云是誰家本師絕藝檀槽掐得如許半灣邏迤無情物惹我傷今弔古君何苦君不見青衫已是人遲暮江東煙樹縱不聽琵琶也應難覓珠淚曾乾處淒然也

恰似秋宵掩泣燈前一對兒女忽然涼瓦颯然飛千歲  
老狐人語渾無據君不見澄心結綺皆塵土兩家後主  
為一兩三聲也曾聽得撇却家山去

江夏女子周炤字寶鐙丰神娟媚兼善詞翰歸漢陽李  
生雲田李固好遊篋中藏炤自寫坐月浣花圖雙鬟如  
霧髣髴洛神廣陵宗定九題風流子詞云梧桐庭院下  
黃昏後又復捲簾鈎見花影一天蟾光如畫太湖石畔  
煙裊甕甌新涼也畫屏閒冷簟蘭芷正嬌秋低喚碧鬟

戲持銀甕露珠輕瀉細潤香柔漢宮人似否簷前月偷  
看灑灑含羞寧讓海棠春睡宿酒初收縱花愁婉婉禁  
寒賺暖浣花人見更惹閒愁何日雙攜畫卷同玩南樓  
或云寶鐙又字絡隱某觀察女為雲田副室年十九所  
至雖謹自蔽匿人得窺見之炤蓋天人也  
尤悔庵曰予亦有踏莎行

詞云坐月青蓮浣花工部閨房之秀兼佳趣燃脂寫出  
麗人行風鬟霧鬢步步碧杜紅蘭明珠翠羽葯房移  
傍湘君住可憐蕩子不歸家長吟蕩婦秋  
思賦葯房夫人齋名雲田自號老蕩子

姚江女師維極幼歲棲真頓悟玄妙微言清雋尤工詩

詞其咏梅云春來了鶯來了凍解霜枝小萼新姿巧聽  
雁云擣衣聲起家聽不盡西澗芭蕉送雨丁葯園歎  
其涉筆蕭疎自是蓮臺上品度繞佛天香一曲贈之云  
茅庵小築疎梅幾樹能伴幽獨無生悟速長齋繡佛前  
身是金粟經翻貝葉清磬裡蓮根似浴微笑拈花儼然  
是先生天竺染翰恣繡竹慧業文人更清福坐老蒲團  
空階秋草綠映不染禪心一枝芬郁誰道仙子塵凡料  
兜率蓬山任歸宿花雨吹煙團成香玉

壬子季夏余客京師偶偕槩子方虎雪客旗亭小飲余  
賦風入松云青春遊俠去江東六博場中旗亭對酒花  
如雪當壚側爛醉吳儂指點綠楊蘸水羸他紫馬嘶風  
偉長文筆少瑜工燕市相逢吹簫擊筑悲歌裡誰憐惜  
爨後枯桐只有石頭周顗典衣埋骨堪從槩子和云澹  
煙濃樹月城東節過天中北窻高臥誰呼起醉鄉深深  
處宜儂幾點白鷗橫渚一雙紫燕穿風西山螺翠晚來  
工雨後難逢南金滿坐連珠斗也包容棄蒯燒桐羨爾

相當旗鼓百年鞭弭吾從方虎和云棗花飛滿坐牆東  
病裡愁中晚涼天氣催人出且當杯莫問誰儂酒浪平  
翻柳浪裙風拖帶荷風掠波燕子晚來工故意迎逢看  
看日落銀塘暗烏啼上金井梧桐歸去重申舊約狗屠  
劍俠吾從雪客和云酒帘聽颺畫橋東綠樹陰中一時  
佳客都相聚斜陽外倍覺愁懷岸柳猶含宿雨隣花暗  
遞香風多情孝穆句偏工醉裡歡逢新詞一闋歌將歇  
似秋宵夜冷梧桐欲覓雙鬟何處且攜鐵板來從大宗



伯芝麓龔公見而喜之亦遙和一闋云客心搖曳住西  
東柳絮空中爭傳紫陌青帘下倩雙鬟譜出歡儂一陣  
催花梅雨滿簾消夏松風五陵衣馬鬪誰工湖海相逢  
唾壺擊碎狂歌發勝淒清露滴新桐寄語酒樓高李論  
文吾欲過從王西樵司勳覩宗伯寄語酒樓高李論文  
吾欲過從之句擊節曰庾公南樓興復不淺

柳村在恒山之南梁冶湄使君讀書其中屬金陵樊圻  
畫柳村魚樂園余有絕句云鴉啼屋角柳藏煙一帶人

家住水邊最愛春晴三月暮夕陽斜繫釣魚船其風景  
宛然江南也曹固庵學士題滿江紅云碧樹清溪孤亭  
外汀沙紆曲閒家具筆床茶竈漁舫如屋湖上綸竿惟  
釣月盤中鱸膾全堆玉曉煙深楊柳蘸晴波村村綠朝  
露泣連畦菊細雨灑垂簷竹有青蓑可著短衣非辱縮  
項鰈肥春水活長腰米白江村足醉香醪船繫夕陽斜  
眠方熟和者數十家於是趙郡自雕橋栢棠村而外無  
勿知有柳村矣

汪蛟門記夢云已酉夏夜夢二女子靚粧淡服聯袂踏  
歌於瓊花觀前唱史邦卿雙雙燕詞至柳昏花暝句宛  
轉嘹亮字如貫珠詢其姓曰衛氏姊妹也及覺歌聲盈  
盈猶在枕畔爰和前調云伊誰艷也看袖拂霓裳廣寒  
清冷柔情綽態却許羅襟相並行過玉勾仙井更翩若  
驚鴻難定衛家姊妹天人不數昭陽雙影溜出歌聲圓  
潤聽落葉迴風十分幽俊最堪憐處唱徹柳昏花暝驚  
醒烏衣夢穩真難覓天台芳信魂消洛水巫山獨抱枕

兒斜凭

乙卯五日泛舟午風酣暢畫舫笙歌湖山環繞冶湄使  
君載酒放鶴亭邊其弟中溪子偶尋小青墓不得微吟  
消魂一半是孤山之句余信口足成之云青青芳草瘞  
紅顏愁對雙峯似翠鬟多少西陵松柏路銷魂一半是  
孤山相與拍浮呌絕酒痕墨瀋幾污衫袖酒半小憩處  
士祠中分韻賦漁家傲一闋已而夕陽在山人影散去  
逋僊有靈亦應呼梅妻鶴子共伴香魂於暮煙衰草之

際也。治湄詞云：面面漣漪，呈繡縠，晚蒲小荇分新綠。何處閒情，聲陸續人爭逐。畫橈龍笛吹寒玉，幾負芳辰空鹿鹿。五絲誰倩春纖束，寂寞香魂遺恨，觸尋芳躅。一阡荒草銷金屋。中溪詞云：湖面晴分錦帶繞，午風謾謾笙歌裊。畫艇飛來，聞語笑，恣遠眺。蒲樽催動紅顏早，涼起孤山停晚棹。梅銷鶴去青苔老。一任閒雲籠翠篠，人懊惱。蛾眉碣蝕香魂杳。余詞云：艾虎釵符懸百結，蘭橈重汎菖蒲節。影漾湖心清又徹，無休歇。子規枝上聲聲血。

瘞玉埋香魂斷絕銀濤江上空嗚咽莫把靈均閒話說

春纖捏半灣邏迤沉檀屑

小青廣陵人為虎林某生妾早卒幾幾居士為之傳有夭

仙子詞云文姬遠嫁昭君塞小青又續風流債也虧一陣黑罡風火輪下抽身快單單另另清涼界原不是鴛鴦一派休算做相思一槩自思自解自商量心可在魂可在著衣又燕雙裙帶傳中又有南鄉子詞止三句云數盡懨懨深夜雨無多也只得一半工夫

宗定九讀書廣陵之東原所居雖茅屋數椽而花間亭新柳堂頗極幽人之致繡水王安節為之繪圖一時名士俱賦詩贈之白門紀伯紫遺以賀新涼詞云手把花

間卷日相羊東原溪閣百情灰遣檐外琅玕垂萬个夜  
夜露啼霜泣葯房靜光明瑩繭汲古騷人恒默坐遡黃  
顓下眎羸劉淺書著就腸紆展堂名新柳朝光顯拂闌  
干燕泥洗淨松圓石扁截盡俗塵苔院閉寂寂莎陰眠  
犬只酒甕頻空不免散絕廣陵誰復繼世螯弧述祖如  
堯典餘碌碌秋風剪

丁雁水紫雲詞云辛酉九月六日余從洪州回虔泊廬  
陵張家渡萬籟鳴秋孤燈照夢髣髴身在全州襍被念

念作買舟他適狀蘇公東坡追送江滸賦詩贈別維時  
煙雨溟濛柳條綰恨殊有黯然可憐之色余迫欲踵和  
竟不能得一語蓋心知蘇公為千古詞人未可輕持布  
鼓而在全州握別若有尤難為懷者因勉填小令一闋  
奉酬醒後朦朧追憶不遺一字急呼童熬燭書之其調  
為平昔倚聲所未及按之樂府雅詞仍不失分寸惜蘇  
公一律不復記憶惋嘆久之余何人斯曷敢冀公之曠  
代相接而粵中全州尤非緣想所至幻境迷離姑述之



以紀異詞云煙雨微茫二月天水連山征人曉立瘴江  
邊默無言十里長亭新柳色旅情牽客中為客最堪憐  
別坡仙

虔南花鳥比中土絕異紅白梅常與桂花齊開可譜入  
風土歲時諸記丁觀察雁水持節雙江于使院傍隙地  
構甃園雜植名卉新城王司成士禎祭告南鎮道出雙  
江題甃園詩云初來甃園裡早愛甃園詩夜雨前山過  
青苔使院滋故人傾卅酒名卉發辛夷物候炎方異春

風生桂枝自後賓朋廢至雁水賦鶯啼序紀事詞云閒  
來署東履履見芭蕉覆地鎖顏牆破屋三間榱桷空存  
而已淒然念前人退食荒涼爰舍今如此急鳩傭垂索  
命僕購材於市壬戌之秋八月既望乃經營爰始厥工  
肇先自軒房墜茨丹堊毋侈遍中庭名葩襍植海棠與  
梅花稱最愛霜枝虬舞螭翻鵠停鸞峙層軒當北別甃  
疎垣使園通花氣更在海柚雙株下結成亭子繞以欄  
干蔭將櫻李徑鋪錦石籬牽芳荔牆陰修竹搖寒翠看

深宵月色涼如水龜魚藻影何殊濯魄冰壺此境疑非  
人世檐楹既具燕雀還來樂在其中矣且消受素屏清  
几贏得身閒客至傳觴夢迴觀史四美或并六宜粗備  
彈琴灌圃皆吾事較陶公運甕差堪比茲園非敢為家  
但欲流行聊隨坎止好事者爭相構寫遂與坡公八境  
臺並傳

古平原村店中姑蘇女子題壁鷓鴣天一闋有收拾菱  
花把劍彈之句庚申春暮丁觀察之任虔南和詞云瓜

字初分碧玉年花枝憔悴一春前陌頭塵浣文鴛錦柳  
外風欺墮馬鬟郵壁上墨光懸柔腸百疊念鄉關才人  
廝養千秋恨箏柱調來拭淚彈頗有白香山商婦琵琶

之感

附錄姑蘇女子原詞云弱質藏閨十六年嬌羞未敢出堂前眉眉顰曠道悲新柳袖捲輕塵擁翠鬟腸

欲斷意懸懸舉頭何處是鄉關臨粧莫遣紅顏照收拾菱花把劍彈壬子北上余猶及見之

河陽角妓紅兒有名曲中嘉善曹學士固庵爾堪為賦  
南鄉子詞贈之云停酒按紅牙蘇合香濃掠鬢鴉秋水  
模糊偏可惜天斜十五娉婷早破瓜愁恨徧天涯飛絮

啼鶯是妾家莫道顰脂開未足驚誇却占河陽一縣花  
或云華亭吳六益懋謙有迎風細鳥啼紅雨隔岸殘霞  
隱畫樓之句亦為紅兒作也

按紅兒一名夢月  
趙女之絕佳者

長安妓趙文素與和州吳采臣觀察共杯酒目成者久  
之比丁酉觀察有行間之役是夜漏下三十刻矣聞剝  
啄聲啓戶視之則文卿也袖出長相思一闕涕泗橫流  
觀察亦以一闕別之後踪跡不知所之矣其詞曰花有  
情月有情花月多情兩地分斷腸直至今聽君行怕君

行來問君家果否行傳聞未必真觀察答云長相思短  
相思長短相思不自知人來夢裡時怕逢伊又逢伊及  
至逢伊却恨遲明朝怎別離

吳蘭次以水部郎出知湖州宋轅文中丞賦浣溪沙送  
之云苔雲煙波百里清碧瀾堂外柳雲輕使君心似玉  
壺冰紅袖人喧桑岸綠白頭翁舞釣竿青共看竹馬向  
前迎風景如畫一時爭傳誦之

西湖女子沈方珠字浦來善詩能文以蘭次代塋其祖

願以身歸之而憚於入署常以減字木蘭花寄吳有若  
肯憐才攜取梅花嶺外栽之句後以事不果遂抱恨而  
卒

吳湖州內子黃淑人能詩湖州常贈以臨江仙一闋中  
有秦嘉書兩紙蘇蕙錦千絲之句其為林下之風蓋不

在王夫人下矣

吳湖州江夏夫人與扶風少君皆有出  
塵之韻湖州常因內宴作詞云一家都

解愛青山  
蓋實錄也

吳湖州詞有把酒祝東風種出雙紅豆梁溪顧氏女子

見而悅之日夕諷詠四壁皆書二語人因目湖州為紅  
豆詞人

吳湖州常於碧浪湖張燈泛舟燈火管絃極一時之勝  
丁葯園儀部作過秦樓一闋以紀其事云太守風流裁  
紅摘翠點就玉湖煙景畫船載酒綉幕調笙香送素波  
千頃樹杪幾隊燈紅鴝鵒飛來驚棲難定更銀蟾一色  
蒨珠宮裡袖搖波影今宵是皓魄初圓青尊浮滿畫裡  
江城如鏡六街簫鼓蘭漿齊開釵色珮聲交迸杜牧當



年管取玉漏將移瓊膏漸暝笑紫雲孰是回盡兩行紅  
粉蓋樊川水嬉之後僅見於此也

廣陵吳壽潛字彤本號西瀛其妻賀氏名字字乃文吳與  
之情好甚篤常戲作你我詞贈之調一七令曰我情埋愁  
裏無奈事如何可薄倖此些痴頑頗頗眼下總成空心中金  
安堪嗟泣慰牛衣難負書乾螢火慢言枕上枉封侯還憐有  
夢卿同我你前來語子誇弄玉隨簫史視我何如憐卿乃  
爾時事笑秋雲韶光悲逝水難忘孔雀屏前常記櫻桃帳

底一生苦樂任天公白頭惟願我和你按此調有平仄  
二韻始於唐人送白樂天即席指物為賦作者頗多然  
諸譜中不載惟楊升庵有風花雪月四作彤本蓋偶與  
其婦為之耳後十年乃文死彤本不勝哀悼諸名士為  
作輓歌甚多彤本亦有無夢詞調子夜歌曰夜臺難道  
情俱死如何只我思量你你若也思量應知我斷腸待  
夢來時省夢也無些影畢竟是多情怕添離恨生

萊陽姜仲子嬖所歡廣陵妓陳素素號二分明月女子後

為豪家攜歸廣陵姜為之廢寢食遣人密致書通終身  
之訂陳對使悲痛斷所帶金指環寄姜以示必還之意  
姜得之感泣不勝出索其友吳彤本題詞吳為賦醉春  
風一闋其詞曰玉甲傳芳信金縷和香褪懸知掩淚訴  
東風問問明月誰憐二分無賴鎖人方寸情與長江  
並夢向巫山近好將環字證團圓認認有結都開留

絲不斷些些心印

吳菌次以二分明月女子集鵲紅夫人集寄弟玉川乞其婦小畹夫人題

跋夫人有絕句云郵筒繞到一緘開明月鵲紅寄集來  
閨閣文人應下拜吳興太守總憐才又朝來窻閣曉粧

蓮小婢研朱滴露時歌吹竹  
西明月滿清輝多半在君詩

芙蓉開遍煙波遶沙洲閑傍輕鷗小小艇畫圖間推蓬  
特地看枝枝嬌艷色野岸無人惜耐老是秋霜應教薄  
海棠甲子九月鉛山道中見野岸芙蓉孫赤崖為賦菩  
薩蠻一詞余和孫韻并錄孫詞云一溪綠水芙蓉繞隔  
江點點搖紅小折向玉瓶間船窻仔細看天生真國色  
不受春風惜秋雨更秋霜風姿勝海棠赤崖亦以自寓  
也

任丘旅店中有女子題壁云妾白浣月號蓮仿家住半  
塘幼失雙親寄養他姓姿容略異慧業不同非敢擅秀  
閨中願效清風林下豈意我生不辰所適非偶日彈琴  
之相對百恨纏綿時捲幔以言征一時哽咽余爰題之  
驛亭人共憐之黃土可耳其詩曰吳宮春深怨別離風  
塵慘慘雙蛾眉鵲啼月落寸腸斷香消芍藥空垂垂流  
黃未工機上織生小殷勤弄文筆新詩和淚寫郵亭珍  
重寒宵誰面壁丙辰三月商丘宋牧仲聲北上過此挑

燈細讀因隳括原詩為調笑令云面壁淚痕濕想見含  
毫燈下立風鬟兩鬢吳宮隔芍藥香消堪惜明妃遠嫁  
歸何日一曲琵琶悽惻河朔間甚為傳唱詞載楓香集  
中

錢塘盧生愛婢姍姍年十五姿容韶秀為嫡所嫉不得  
已遣去其友王丹麓暉賦調笑令第一體嘲之曰桃葉  
桃葉忽被風姨催別拋殘無限春光枉對花枝斷腸腸  
斷腸斷小玉時常誤喚

王丹麓少時中表章進士欲妻以女王父母以章將赴  
遠任議遂不諧後章歸籍丹麓往省見其女乃殊色也  
因賦如夢令云記得那時相見正似芙蓉初艷生小兩  
情濃不料紅絲錯綰誰怨誰怨悔却當初一面

道喇金元戲劇名也似俗而雅錢塘陸雲士次雲賦滿  
庭芳詞云左抱琵琶右持琥珀胡琴中倚秦箏冰絃忽  
奏玉指一時鳴唱到繁音入破龜茲曲盡作邊聲傾耳  
際忽悲忽喜忽又恨難平舞人矜舞態雙甌分頂頂上

然燈更口噙湘竹擊節堪聽旋復迴風滾雪搖絳臘故  
使人驚哀艷極色飛心駭四座不勝情徐華隱嘉炎云  
此等題極宜留詠以補風俗通之所未載

壬子季夏余同曹掌公朱人遠卓永瞻葉元禮周雪客  
宋楚鴻王季友集周鷹垂寓齋時掌公初至都門雪客  
及予將南還雪客賦水調歌頭云簾外雨初霽六月喜  
新涼一時座上佳客大半是江鄉子建恰當初至孝穆  
何堪遠別睹酒興飛揚我亦欲分手歸去臥滄浪看袞



袞登紫閣賦長楊渾如鸞鳳雲中接翅下高岡何用徵  
歌擊鉢且共藏鈎射覆一飲罄千觴羸馬醉馳去高柳  
挂斜陽一時同人皆有和詞未幾風流雲散彈指六七  
年永瞻元禮俱為異物丁未十月余宦京邸永瞻弟次  
厚過余話舊賦齊天樂云西風黃葉都零亂吹得遊人  
意倦新恨未消舊愁重咽相對大家難遣况逢旅雁看  
天外遙征聲聲幽怨思量舊雨寒煙空鎖垂楊岸酒壚  
燕市未渺舊遊零落盡難呼酒伴物換星移天高木落

不覺奈何頻喚離懷無限縱憔悴依人身同秋燕一曲

淒涼淚珠空自泣

朱人遠序曰次厚為永瞻愛弟子交永瞻凡十餘年壬子季夏偕遊金臺

當是時名流雲集訂文酒之好若吳江徐子電發葉子元禮中州周子雪客雲間宋子楚鴻周子鷹垂王子季友魏里曹子掌公結兄弟歡如一日乃未幾別去永瞻後予半載亦歸里無何竟卒嗟乎一日之集不過九人凡人之交僅得八載其間或掇巍科侍帷幄或以草茅召見官侍從或偃臥里門或汗漫遊四方如晨星之落落或不遇而死或遇矣復死於旅邸何人事之靡常若是歟此九人者當其以筆墨杯斚為樂事非不知聚者之終不能不散然不意其散之遽也及既散矣非不知散者之復聚然不意其升沈生死之竟至於此使更知者愈不可知此予嘗為之慷慨太息流涕交襟也

庚戌秋山陽黃大宗客西湖九日為登高會客少至十  
九日倣古為展重陽客咸集而天雨大宗曰吾當再展  
重陽以二十九日大會四方之客登孤山詩文極盛即  
事分賦各體體凡二十武林王丹麓拈得詩餘其望遠  
行第三體云兼旬兩過重陽節却又秋光垂暮芙蓉已  
老籬菊將殘只剩霜林紅樹旅客驚心特把佳辰再展  
贏得曠懷如許共登高不禁徘徊今古難語試上層岡  
一望見纍纍荒墳無數蟋蟀閒堂鳳凰金闕不識銷歸

何處但有芳樽細飲檀槽遞唱遑問誰賓誰主奈夕陽  
西下鐘聲催去詞成令小鬟歌之座客無不歎絕

李雲田既娶周寶鐙復迎侍兒掃鏡於吳門無錫嚴蓀  
友賦瑞龍吟一闋調之云吳趨里誰在小小門庭溶溶  
煙水柔枝乍結春愁盈盈解道塗妝綰髻癡情難擬不  
比舊家桃葉綠陰深矣檀郎近約相迎雀釵新黛玉符  
空翠休問石城艇子更堪腸斷竹西歌吹唯有泰娘橋  
邊離夢猶繫漢臯珮冷別是傷心地待攜向蘭缸背底

菱花偷展誰照郎心切探春試問看風來未蜂子憐新  
蕊香破也報來幽窻慵起吟牋賦筆待伊次第

丁葯園祠部少時有白燕樓詩百首流傳吳下士女爭  
相採掇以書衫袖婺州吳賜如之器有句云恨無十五  
雙鬟女教唱君家白燕樓其為一時傾倒如此後以事  
徙關外皂帽歸來偶於邗上逢王西樵考功賦夢揚州  
一闋云公言愁愁未了我始言愁總是愁城何日破除  
方休吳市裡酒徒落魄王生召我為儔桓野笛楊惲缶


并呼鼓史岑年同作南冠楚囚各相對唏噓亦復何求  
散盡千金一劒荆綬空留歌相樂也因而泣怎銷磨短  
髮盈頭只落得兩人白眼共醉揚州曹學士見之曰僕  
與祠部俱從冰天雪窖中磨鍊而出有甚於退之潮州  
東坡儋耳者辨此情懷庶不使韓蘇笑人寂寂

杭州女教場在鳳凰山麓宋南渡妃嬪演武於此蕭山  
毛大可奇齡過之賦鷓鴣天云銀甲瑯戈小隊工內家  
宣勅教從戎山蘿覆鐵縈金細野火燒旗閃幔紅宮月

靜陣雲空鳳凰山下抱龍弓珠璣玉靽圍營路小雨寒  
花何處逢余亦有絕句云御教場中看點操宮娥隊隊  
雁翎刀鄂王已戮蘄王死羞著團花舊錦袍蓋傷南宋  
之不復振也

沈家姬外娘善度曲曹秋岳侍郎戲用外字賦青玉案  
為贈云花前舉樂何須忌薄曉瞳瞳初麗啓戶逢君嬌  
不語三秋兔魄平分留影垂柳東邊去鏤成新玉剛為  
字十二時中排第四中酒嫌人知也未芳名檢點春光

已半會取相迎意



詞苑叢談卷九